

### *ASO LULU, 15 MATI 2023*

*Na nofoia e le Fofoga Fetalai le Nofoa i le itula e 9:28 i le taeao.*

Tatalo.

**FOFOGA FETALAI:** Ou te faasilasila atu ua amatalia nei Tualumaga a le Fono Aoao Faitulafono.

Ou te faatalofa atu i tulaga aloaia i le maleifua mai i le lagi e mama ma le soifua manuia i lenei taeao fou le paia o le Palemene. I le afio o lau Afioga i le Sui Palemia, afifio le paia o le Kapeneta i alii ma tamaitai Minisita, afifio foi Afioga i Minisita Lagolago.

Afio lau Afioga i le Taitai o le Itu Agai, afifio sui usufono mamalu uma o le Palemene. Ua tatou tau mai i le toe aso o le tatou Fonotaga i lenei foi masina, faamalo le ta'i o le lau, faamalo le fō o le lau. Malo fai o le faiva, faamalo le onosai ma le faapalepale, o lo o agalelei lava le Atua i le soifua laulelei ma le malosi faafouina o lo o tului pea i lo outou maua. Tatou viia ma faaneene Lona suafa paia ona o mea silisili ua Ia faia mo lenei Palemene.

Ua tatou le mafuta ma le Taitai o le Malo ma nisi o le tatou Maota ona o tuatua ua silafia. Tatou tatalo pea i le alofa o le Atua e malutia ai faiva o latou feagai ai.

E faatalofa atu foi i le saofaiga a Ofisa Sili o Pulega o Matagaluega ma Faalapotopotoga Tumaoti a lo tatou Malo. Malo faafetai lo outou onosai mai i auunaga e lagolago ai galuega fai a lau Palemene, viia le Alii i lo outou lagi e mama i lenei taeao.

E maua foi le taofi o lo o maua pea le soifua manuia ma le lagi e mama i le maleifua mai o si o tatou atunuu i lenei taeao, i ona tulaga faalupelupeina i Samoa nei ma atunuu e mamao, taeao manuia, malo le lagi e mama. Tapuai maia ma le manuia i le alofaiva o lau Palemene i lenei aso.

Le alofaiva o le Palemene i lenei aso, e lamatia lava i tatou i mailei a le tiapolo, tulou le gagana, a o le tatalo a le Fofoga Fetalai, ia o tatou seu i atasina aua e tua i ao malama. A o upu foi a le tamaitiiti Eperu, “Le Alii e, ia e faia se loto fou mo a’u ma ia e faafouina se loto mau i totonu ia te a’u.”

Agalelei le Alii i le tofa ma le utaga fetalai i lenei aso, manuia tele le usufono a le Palemene, manuia foi le tapuaiga a Samoa.

## TUUINA ATU O PEPA

*Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).*

1. P.P.2022/2023 Nu.174, Tali a le Malo i le P.P.2022/2023 Nu.96, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2020/2021 Nu.118 & P.P.2021/2022 Nu.45, Lipoti Faaletausaga a le Komisi o le Toefuataiga o Tulafono a Samoa mo Tausaga Faaletupe 2019/2020 & 2020/2021.

Ma le faaaloalo lau Afioga.

**P.P.2022/2023 NU.114, LIPOTI A LE KOMITI O LE VAEGA TAU I LE TAMAOAIGA I LE P.P.2021/2022 NU.50, LIPOTI FAALETAUSAGA A LE MATAGALUEGA O PISINISI, ALAMANUIA MA LEIPA MO LE TAUSAGA FAALETUPE 2020/2021**

**P.P.2022/2023 NU.172, TALI A LE MALO I LE P.P.2022/2023 NU.114, LIPOTI A LE KOMITI A LE VAEGA TAU LE TAMAOAIGA I LE P.P.2021/2022 NU.50, LIPOTI FAALETAUSAGA A LE MATAGALUEGA O PISINISI, ALAMANUIA MA LEIPA MO LE TAUSAGA FAALETUPE 2020/2021 – ILOILOGA**

**FOFOGA FETALAI:** E tolopo Taulumaga a le Fono Aoao i le afiafi ananafi ua maea pasia le lafo mo le tolaulauina o Sailiiliga, Fautuaga ma Iugafono a le Komiti o le Vaega Tau le Tamaoaiga i le Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe 2020/2021.

Ou te tapa lau Afioga i le Taitaifono mo le Tolaulauina o Sailiiliga, Fautuaga ma Iugafono a le Komiti.

Tulai mai lau Afioga i le Taitaifono.

**Afioga NIUAVA ETI L. MALOLO (Taitaifono Komiti o le Vaega Tau Tamaoaiga):** Faafetai i lau Afioga i le Fofoga Fetalai. E manatu o lea ua maea ona fusi le fau o malo, ua e faatuti'e afega ma ua e ta foi le tavai e fai ma too taumua aua le Atua ma Lana faasinoala i lenei taeao.

Ou te faatalofa i lau Afioga i le Fofoga Fetalai o le Maota. E manatu i galuega o lena vaiaso ua sola e le faigofie, i ou feaoga ma lou tautapa

faalupea, i ou mailiili faafalaepa, lau Afioga i le Fofoga Fetalai, o oe e faasagamau i ai navenave ma lilipi tialogo i ai le toau manunu o le Palemene o Samoa. Malo lototele. Alafai mai i faguga lelei le paia i le Palemene, le Palemene totofi o Samoa.

E faatalofa i lau Afioga i le Sui Palemia, le Aiga Kapeneta ae a le saofaiga o Minisita Lagolago. E faatalofa foi i le sui usufono mai Vaimauga 3.

E faatalofa i lau Afioga i le Taitai o le Itu Agai aemaise foi o sui usufono mamalu o le Palemene i lena foi itu.

E faatalofa i le aufaigaluega totofi a le Atua, o ē o lo o talafaauto i itu e fia o le lalolagi, e tauasu le ipu aua le talalelei tauave a lo tatou Alii.

E faatalofa i le Ofisa Sili Lagolago ma Ofisa Sili o Pulega ua faapea ona tatou mafuta i lenei taeao. Le paia o Samoa i la outou fita faafofoga i lenei taeao.

Lau Afioga i le Fofoga Fetalai, ou te tulai ma le ava tele, e tautala foi ma le faaaloalo e faaleo le Lipoti a le Komiti o le Vaega tau le Tamaoaiga, P.P.2021/2022 Nu.50, Lipoti Faaletausaga a le Matagaluega o Pisinisi, Alamanuia ma Leipa 2020/2021.

### **TAUALUMAGA:**

O le aso 27 o Oketopa 2022 na feagai ai le Komiti o le Vaega Tau le Tamaoaiga ma le iloiloaina o le Lipoti Faaletausaga a le Matagaluega o Pisinisi, Alamanuia ma Leipa ua faapea ona tuuina mai e le Fono Aoa. O lenei Lipoti Faaletausaga, e mo le tausaga faaletupe 2020/2021.

O lenei Lipoti a le Komiti o le a auiliili atu ai galuega sa mafai ona ausia e le Matagaluega i totonu o le tausaga faaletupe 2020/2021. Na iloiloaina faatasi ai ma luitau sa latou feagai i le faatinoina o a latou galuega.

O nisi o vaega taua sa mafai ona faamauina e le Komiti ua tuuina atu ai ana fautuaga. O le naunautaiga o le Komiti, ia faatumauiina pea le maua luga o le faatinoga o galuega a le Matagaluega.

### **AOTELEGA O SAILIILIGA**

#### **MATAFAIOI AUSIA:**

E tele galuega sa faatino e le Matagaluega i totonu o le tausaga faaletupe e iloiloaina na faamauina e le Komiti. O nei galuega ua mafai ona vaevaeina i lalo o vaega tetele ua faailoa atu i lalo.

## **Atiae Vaega Maoti ma le Faafaigaluegaina o Tupe mai Fafu.**

### **1. Faiga Faavae ma Taiala mo Atinae o Pisinisi Laiti i Samoa 2020 (MSME Policy 2020)**

Na faalauiloa ia Aperila i le 2021 le Faiga Faavae ma Taiala mo Atinae o Pisinisi Laiti i Samoa (MSME Policy 2020) ma e tusa ma le 90% o Pisinisi Laiti ua faamauina lo latou sao taua i le atinaeina o le Tamaoaiga o Samoa. Na fausia lenei Taiala ina ia fesoasoani i Pisinisi Laiti i le siitia o tulaga i fefaatauaiga ma le tamaoaiga o Samoa, siitia oloa gaosi e mafai ona auina atu i fafo, ia tulaga muamua i faiga o fefaatauaiga faatauvaga. Ia i ai se sao o Pisinisi Laiti i le Vaega o Turisi, faatoaga, oloa gaosi, auaunaga faapitoa e aofia ai ma auaunaga e faaaogaina ai auala faatekonolosi.

### **ii. Atinae mo Pisinisi o Tina ma Tamaitai (Catalysing Women Entrepreneurship)**

O le Atinae o Pisinisi a Tina ma Tamaitai o se tasi lea o Poloketi taua o lo o lagolagoina ma faatupeina e le Malo o Kanata e tauala mai le UNESCAP mo le 5 tausaga, ma e 6 atunuu o le lalolagi o lo o faatinoina ai e aofia ai ma Samoa. O le autu o lenei Poloketi ina ia faamausali atili faiga faavae ma metotia e faafailele ai atinae tau pisinisi mo Tina ma Tamaitai i le atu Asia ma le Pasefika, ma o se vaega ua mafai ona ausia ai nisi o sini autu ua faataatia i totonu o le Faiga Faavae ma Taiala mo Pisinisi Laiti 2020.

### **iii. Lesitala o Igoa o Pisinisi (Business Names Register)**

O lenei resitala fou o le a fesoasoani ia i latou o lo o fuafua e amata a latou pisinisi fou. O lo o i ai fuafuaga e amatalia i le tausaga faaletupe fou faatalatalanoaga faalauaitele mo lenei faatinoga e tusa ai ma faatalatalanoaga i lotoifale a le Matagaluega ua maea ona faatino.

## **Uunaia le Siitia o Oloa Gaosi ma Fefaatauaiga Talafeagai ia Ausia Faiga Faatauvaga lelei ma le Amiotonu.**

### **i. Taiala mo le Atinaeina o Alamanuia (National Industry Development Policy (NIDP) for Samoa)**

Ua mafai ona faagasolo tapenaga a le Matagaluega i le Taiala mo le Atinaeina o Alamanuia (National Industry Development Policy for Samoa) e ala i le lagolago mai a le Malo o Niu Sila. O le vaaiga taulai a lenei Taiala, ia siitia tulaga o atinae i Vaega maoti e faatupulaia ai oloa gaosi ma auaunaga e mafai ona fefaatauai ai ma isi atunuu i fafo

aemaise o le avea ai ma Taiala i le Malo ma Vaega Maoti ina ia maualuga tulaga o fefaatauaiga faatauvaga ma le galueaiina o pisinisi.

**ii. Fesoasoani Tau Tupe mo Vaega Maoti (PSO Grant \$250,000).**

O lo o faaauaiiina pea le fesoasoani Tau Tupe a le Malo mo Vaega Maoti. E 12 le aofai o Faalapotopotoga Tumaoti sa faamanuiaina i lenei fesoasoani mo a latou galuega faaofisa aemaise o aafiaga na feagai ma a latou atinae i le faamai o le Koviti-19.

**iii. Fausia Tulaga Faamaonia mo Oloa eseese e siitia ai le usitaia o aiaiga o Fefaatauaiga Faatauvaga (National Standards to increase compliance with fair trading and competition).**

E 2 ni Tulaga Faamaonia (National Standards) o lo o ua tusiaina aua le puipuia o aia tatau o tagata faatau po o e o lo o faaogaina oloa eseese.

1. Tulaga Faamaonia o Taavale.
2. Tulaga Faamaonia mo Faailoilo o Oloa e le o ni Taumafa.

**Fausia Avanoa Faigaluega ma se Siosiomaga Saogalemu ma le Soifua Maloloina i Galuega mo Tagata uma.**

**i. Galuega Faavaitaimi (Seasonal Work)**

E tusa ai ma le Lipoti sa iloiloina, na faamauina ai e le Komiti le aofai e 729 o tagata Samoa sa faa-faigaluegaina i galuega Faavaitaimi i Niu Sila ia Teesma 2020, ina ua faailoa mai isi avanoa faigaluega e 2,000 ua toe faaopoopo mai le Pasefika. E 6 masina le umi o nei konekarate faigaluega. I le taimi nei, ua sili atu ma le 2,000 tagata faigaluega o lo o galulue i galuega faavaitaimi i Niu Sila e aofia ai e sa toe faaopoopo isi aso o a latou visa faigaluega ina ia mafai ona faaauau pea le faafaigaluegaina ina ua tapunia tuaoi faava-o-Malo faapea femalagaiga.

E 1,025 tagata faigaluega ua mafai ona auina atu i Ausetalia mo galuega faavaitaimi, ma o lo o faaauau pea i le taimi nei tapenaga o isi aumalaga ona o le maualuga o le manaomiaga e Kamupani o tagata faigaluega e galulue i faatoaga ma galuega tausii matua i Ausetalia.

E 1,600 tagata faigaluega faavaitaimi ua mafai ona faatalatalanoa, iloilo a latou talosaga ma faatino a latou sueuega o le soifua maloloina ma ua faailoa ua saunia ma agavaa mo galuega

faavaitaimi. Sa faauuau polokalame toe foi mai mo le aufaigaluega ua toe talii mai i galuega faavaitaimi ma ua ausia ai ma le fua faatapulaa o aoaoga sa fuafuaina e faatino i le tausaga faaletupe sa iloiloaina.

**ii. Polokalame Aoaoga Faa-Aperenitisi ma Galuega.**

E 61 e ua i ai le tomai o Matata Eseeese sa faauuina i le Faauuga o le Polokalame Faa-Aperenitisi ia Ianuari 2021. E 34 o i latou ua maea tausaga e 4 o le Polokalame Faa-Aperenitisi ma le 27 o i latou sa pasia suega o Matata Eseeese sa faatinoina i le Tausaga Faaletupe 2020/2021.

**iii. Usitaia o aiaiga o Tulafono o le Saogalemu ma le Soifua Maloloina i Galuega**

E na o le 66.7% le aofai o falefaigaluega e 91 na asia o lo o usitaia aiaiga o le Tulafono o Saogalemu ma le Soifua Maloloina o Galuega.

E 9 Tusi Taiala e tali atu i Faalavelave Faafuasei ma faalavelave tutupu i falefaigaluega sa mafai ona faalauiloaina ia Aperila 2021 i le taimi sa faamanatu ai e Samoa i le Aso Faapitoa o le Saogalemu ma le Soifua Maloloina i Galuega i le Lalolagi.

E 70 sui ma Vaega Maoti ma Faalapotopotoga Tumaoti a le Malo sa faamanuiaina i Tusipasi e faailoa ai ua i ai le tomai ma le agavaa e faatinoina ai galuega faaola po o le Fesoasoani Muamua a le Koluse Mumu.

Lau Afioga i le Fofoga Fetalai, e i ai itu taua na maitauina e le Komiti.

**ITU TAU NA MAITAUINA E LE KOMITI**

**1. *Lesitalaina o Igoa o Pisinisi***

Na faamauina e le Komiti mai ana iloiloiga, o le lesitalaina o igoa o pisinisi i totonu o le atunuu o se tasi o galuega ua vaavaai i ai le Matagaluega mo le faatuina. O se gaoioiga ua manatu le Matagaluega e taua tele i le tulaga o le faaleleia o le siosiomaga o le faatinoga o pisinisi ma fefaatauaiga i totonu o Samoa.

**2. *Faamanuiaga mai le Malo mo Faalapotopotoga Tumaoti (PSO Grant).***

Na faamauina foi e le Komiti le tuutiitia o Faalapotopotoga Maoti sa agavaa i le fesoasoani a le Malo (PSO Grant) o lo o taua atu i le Matagaluega i tausaga taitasi. Na maua i iloiloiga a le Komiti, e

na o le 12 le aofai o asosi ma faalapotopotoga sa faamanuiaina i lea fesoasoani e tusa ai ma le usitaia o Taiala ma faiga faavae a le Matagaluega i ala i Lipoti na tuuina atu o lo o faailoa ai le faaoga tatau o seleni e atiae ai pisinisi. Na maitauina foi le tele o faasea i Taiala ma Faiga Faavae o lo o aiaia ai talosaga e tuuina atu ma o se faafitauli ua manatu le Komiti e ao ona toe silasila i ai le Matagaluega e faafaigofie ma faatuina ni Taiala gafataulimaina aemaise o le mataitu lelei o le faasoasoina o nei faamanuiaga ia laugatasia uma ai Faalapotopotoga Tumaoti aua le atinaeina o le tamaoaiga o Samoa.

### **3. *Galuega Faavaitaimi.***

E tusa ai ma iloiloga a le Komiti, na maua ai o lo o talia pea le fautuaga a le Matagaluega sa tuuina atu i le Kapeneta i le tulaga o le faamatuu atu i tua o le faagasologa o filifiliga o tagata faigaluega faavaitaimi i nuu ma afioaga. O le isi itu taua sa maitauina o lo o faaauau pea ona avea ma faafitauli le tulaga i faasea mai tagata Samoa o lo o galulue i galuega faavaitaimi i fafo e faatatau i le leai o se fesootaiga ma le Ofisa Sooupu ona o le vavamamao o nofoaga e faamautu ai ma le lava o Ofisa Sooupu e soalaupuleina a latou faafitauli ma faatautaia galuega faavaitaimi.

Lau Afioaga i le Fofoga Fetalai, ona ou oo mai lea i Fautuaga a le Komiti. O le maea ai o Iloiloga a le Komiti, e fautuaina ai le Malo ina ia:

#### **Fautuaga 1:**

Silasila totoa i le fauaisiaina o se Tulafono ma ni faiga faavae talafeagai e mataituina ai le faatinoina o nisi o auunaga a le Matagaluega e pei o le resitalaina o pisinisi i totonu o le atunuu. Ia galulue faatasi foi ma isi Matagaluega a le Malo i le faamalasia ma le faamamaluina o nei Tulafono ma faiga faavae o le a fausia mo le taialina o galuega a le Matagaluega.

#### **Fautuaga 2:**

Faamalasia le faatinoina o aoaoga e siitia ai le tomai ma le agavaa o le aufaigaluega i mataupu tau le saogalemu ma le soifua maloloina i galuega aemaise o polokalame faalauiloa mo le mamalu lautele. O le aotauina o tagata faigaluega o Faalapotopotoga a le Malo ma Pisinisi maoti i le taua o le saogalemu i totonu o falefaigaluega o le a mafai ai ona foia ma faaitiitia faalavelave tutupu ma o le a siitia i le malamalamaaga o tagata e faaoga oloa ma le aufaipisinisi i Tulafono e ao ona usitaia.

**Fautuaga 3:**

Mataitu lelei le faasoasoina o faamanuiaga tau tupe mai le Malo mo Faalapotopotoga Tumaoti ina ia laugatasia tagata uma aemaise o le faafaigofieina o Taiala ma aiaiga mo Talosaga a Pisinisi o lo o fia talosaga i nei faamanuiaga maua fua mai le Malo.

**Fautuaga 4:**

Unaia le toe faaopoopo o nisi avanoa faigaluega fou ma faamalositia talosaga mo ni vaegatupe faaopoopo e faatupeina ai nei avanoa e tusa ai ma le utiuti o le aufaigaluega e faatinoina matafaioi ma galuega i ona vaega eseese aemaise lava i le vaega o Galuega Faavaitaimi.

**Fautuaga 5:**

Silasila totoa i le filifiliina o tagata faigaluega mo galuega faavaitaimi ina ia laugatasia ai afioaga uma o le atunuu. Silasila foi i ni faiga faavae e aiaia ai amioga le talafeagai a i latou o lo o auai atu i galuega faavaitaimi.

**Fautuaga 6:**

Faamalositia le galulue faatasi ma paaga faava o Malo. O se auala lea e manatu le Komiti e tauala mai ai nisi fesoasoani mo vaega o lo o manaomia ona toe faaleleia e pei o aseta ma le faatupeina o isi galuega taua mo le faamautinoaina e atoatoa le ofoina atu o le auunaga faatino a le Matagaluega. O Iugafono lau afioga i le Fofoga Fetalai, i le maea ai o iloilogaga a le Komiti, na faaiugafonoina ai e fautuaina le Fono Aoa, *Ina ia faamaonia le lipoti P.P. 2021/2022 Nu 50, Lipoti Faletausaga a le Matagaluega o Pisinisi Alamanuia ma Leipa 2020/2021.*

Ma lou faaaloalo tele lau afioga i le Fofoga Fetalai ma le paia o le Maota.

**FOFOGA FETALAI:** Ia malo saunoa i lau afioga i le Taitaifono, o lea ua faafofoga manino le paia o le Maota e tusa foi o le tolaulauga o a outou Sailiiliga aemaise foi o Fautuaga ma Iugafono a la outou Komiti, ia malo le galulue, faafetai mo le galuega. Ou te tapa lau afioga i le Sui Minisita o Pisinisi, Alamanuia ma Leipa, Hon Toolesulusulu mo le tali a lo tatou Malo.

**Afioga Hon TOEOLESULUSULU CEDRIC POSE SALESA SCHUSTER (Sui Minisita o Leipa ma Fefaatauaiga):** Lau afioga i le Fofoga Fetalai, ou te tolaulauina tali a le Malo e faatatau i fautuaga a le Komiti i Vaega Tau le Tamaoaiga, pei ona folasia manino nei e le Taitaifono.



A o le i oo atu i lea tulaga lau Afioga i le Fofoga Fetalai, avea foi lenei avanoa e faatalofa atu ai i lau afioga i le Fofoga Fetalai ma le paia ma le mamalu i sui usufono o le Palemene. E piiama foi i le taulaga ua e molia aua so tatou faanonomanu i le faatasi mai o le Agaga paia i le Fonousu a le Palemene. E faapea foi lau folasaga e faatalofa ai, i Sa ma Faiga o Samoa, o faafogafoga tapuai mai.

Lau afioga i le Fofoga Fetalai, a o le i oo atu i le vaega o le tali, e fia faailoa atu foi i le tatou Palemene aemaise le paia o le tatou atunuu, o lea aso foi o lo o faapea ai ona faailoga le aso faapitoa o aia a tagata e faaogaina oloa, poo o le Consumer International Day. O lenei polokalame o lo o faagasolo pea i tausaga taitasi, ma o le faalauiloa foi lea o aiatatau a i latou e faia faatau. O lo o faagasolo nei i le aso le polokalame faalauiloa mo Upolu o lo o faatinoina i Poutasi. A i ai foi nisi o lo tatou atunuu, o mafai ona outou autovaa atu i ai e faalogologo ma fesili ai foi. E faamoemoe foi e faatio i le aso 17 Mati i le afiogaaga, le EFKS i Sapapalii. O lenei lava avanoa e aoga, e i ai fesili, ia ma maua ai foi se avanoa e faamalamalama ai e le tatou Matagaluega nisi o vaega o lo o i ai ni atugaluga o le tatou atunuu, aemaise foi o nisi o fautuaga e mafai ona matimati ai le galuega a le Matagaluega, ma le auaunaga a lo tatou Malo.

Ona see mai lea lau afioga e tusa ai ma le lipoti a le Komiti. E avatu foi le faafetai i le Taitaifono aemaise le paia ma le mamalu o sui o le Komiti sa faapea ona latou iloiloaina lenei lipoti. E talitonu, o le tele o nisi vaega lau afioga i le Fofoga Fetalai, ia sa faapea ona maua ai tali i le lipoti sa faapea ona iloiloaina i aso ua tuanai atu i le tatou Palemene. Ae mo fautuaga ua faapea ona tuuina mai i le lipoti lea. O le tali a le Malo, i le P.P.2022/2023 Nu.114, Lipoti a le Komiti o le Vaega Tau le Tamaoaiga i le P.P.2021/2022 Nu.50, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe 2020/2021.

### **Fautuaga 1:**

Silasila totoa i le fausiaina o se tulafono ma ni faiga faavae talafeagai e mataituina ai le faatinoina o nisi o auaunaga a le Matagaluega. E pei o le lesitaslaina o pisinisi i totonu o le atunuu. Ia galulue faatasi foi ma isi Matagaluega a le Malo i le faamalosia ma le faamamaluina o nei tulafono ma faiga faavae o le a fausia mo le taiialaina o galuega a le Matagaluega.

### **Tali**

Ua faamauina e le Matagaluega le fautuaga a le Komiti. Ua maea ona faataunuuna faatalatalanoga amata i le tausaga 2020/2021 ma i latou uma e ono aafia i lenei lesitala fou mo igoa o pisinisi o lo o fuafua, e aofia ai sui mai Matagaluega a le Malo faapea ma le au faipisinisi. O lo o fuafua foi e faatino nisi faatalatalanoaga faalauaitetele i le tausaga 2023, ma sui mai

Matagaluega a le Malo ma le au faipisinisi, pe a maea le tusiaina o le tulafono tau faaofi, mo le lesitala o igoa o pisinisi.

**Fautuaga 2:**

Faamalosia le fatinoina o aoaoga e siitia ai le tomai ma le agavaa o le aufaigaluega i mataupu tau le saogalemu, ma le soifua maloloina i galuega aemaise o polokalame faalauiloa mo le mamalu lautele. O le a aotauina o tagata faigaluega o Faalapotopotoga a le Malo ma pisinisi maoti i le taua o le saogalemu, i totonu o fale faigaluega, o le a mafai ai ona foia ma faaititia faalavelave tutupu, ma o le a siitia ai le malamalamaaga o tagata e faaoga oloa ma le aufaipisinisi i tulafono e ao ona usitaia.

**Tali**

Ua faamauina e le Matagaluega le Fautuaga a le Komiti.

O lo o faaauau pea faalauiloa a le Matagaluega i le atunuu atoa e auala atu i le Vaega o Fefaatauaiga Talafeagai, ina ia saga siitia le malamalamaaga a tagata faatau, aemasie o le aufaipisinisi i o latou tiute tauave faaletulafono, i tulaga tau fefaatauaiga, faatinoina o pisinisi ma aiaiga o tulaga tau galuega. E tusa ma le 95% itumalo ma aog ai le atunuu na faatautaia i ai polokalame faalauiloa, i tausaga ua mavae. Na faaaogaina auala o fesootaiga faaonaponei, e pei o televise, leitio ma faasalalauga i upega tafailagi, e faatinoina ai faalauiloa ina ua faamalosia vavao ma poloaiga o Faalavelave Faafuasei. O lo o faaauau pea polokalame faalauiloa a le Matagaluega ina ia faasopolia uma le atunuu aua lo latou nofo silafia ma manino ia latou matafaioi faaletulafono. Ia faaititia faafitauli tulai mai i taimi o fefaatauaiga ae ia maua se siosiomaga talafeagai, mo faafetauaiga ma ia sologa lelei le faafoeina o pisinisi aua le manuia lautele o le tamaoaiga o le atunuu.

O lo o faaauau foi polokalame faalauiloa a le Matagaluega e ala atu i le Vaega o Saogalemu ma le Sofua Maloloina i galuega i Upolu ma Savaii. E 9 Tusi Taiala na tuuina mai ai le fesoasoani a le Malo o Ausetalia sa tusia mo le silafia e fale faigaluega e ao ona faatinoina, pe a oo ina tutupu mai ni faalavelave i fale faigaluega e aafia ai le saogalemu ma le soifua maloloina o tagata faigaluega. Sa faaaogaina foi upega tafailagi ma le televise e momoli atu ai le faalauiloa ma le feau i le mamalu o le atunuu.

**Fautuaga 3:**

Mataitu lelei le faasoasoina o faamanuiaga tau tupe mai le Malo mo Faalapotopotoga Tumaoti ina ia laugatasia tagata uma aemaise o le faafaigofieina o Taiala ma aiaiga mo talosaga a pisinisi o lo o fia talosaga i nei faamanuiaga maua fua mai le Malo.

**Tali:**

Ua faamauina e le Matagaluega le Fautuaga a le Komiti. O lo o faatinoina e le Matagaluega le tuituliloaina o lipoti, mai i faalapotopotoga agavaa, i le faamanatu lea o nei faalapotopotoga i le lima masina, a o le i faagataina le tuuina mai o lipoti. O Faalapotopotoga e le i tuuina mai ni a latou lipoti ua maea ona sueina e se Suetusi, Lipoti Faaletausaga, Fuafuaga mo le Atinae o le Faalapotopotoga ma faafou le lesitala o le latou Faalapotopotoga e le agavaa i le fesoasoani.

Ua maea foi ona toe Iloilo aiaiga o le fesoasoani faapea pepa talosaga mo le faafaigofieina o le lipoti mai o Faalapotopotoga ma fesoasaoni foi i le Matagaluega, mo le iloiloaina o nei lipoti mo le tuuina atu i le Kapeneta mo le latou faaiuga.

**Fautuaga 4:**

Uunaia le toe faaopoopo o nisi avanoa faigaluega fou ma faamalositia talosaga mo ni vaegatupe faaopoopo e faatupeina ai nei avanoa e tusa ai ma le utiuti o le auaigaluega, e faatinoina mataifaioi ma galuega i ona vaega eseese aemaise lava i le vaega o galuega faavaitaimi.

**Tali:**

Ua faamauina le fautuaga a le Komiti. O lo o galulue faatasi le Matagaluega ma le Komisi o Galuega a le Malo e Iloilo talosaga a le Matagaluega, mo le toe fetuutuunai o auivi o Vaega o le Matagaluega, ma faamaonia avanoa faigaluega fou o lo o talosagaina i Vaega o auunaga taitasi a le Matagaluega, ina ia mautinoa o lo o i ai tagata faigaluega moomia e faatinoina auunaga a le Matagaluega i ona itutino eseese. O lo o fesoasaoani mai foi paaga soofaatasi a le Matagaluega, e faatupeina avanoa faigaluega le tumau e fesoasoani i galuega faatino a le Vaega o galuega faavaitaimi.

**Fautuaga 5:**

Silasila totoa i le filifiliina o tagata faigaluega mo galuega faavaitaimi ina ia laugatasia ai afioaga uma o le atunuu. Silasila foi i ni faiga faavae e aiaia ai amioga le talafeagai a i latou o lo o auai atu i galuega faavaitaimi.

**Tali:**

Ua faamauina e le Matagaluega le fautuaga a le Komiti. O le naunautaiga a lo tatou Malo ia faatumauina le maua e Samoa o faamanuiaga, mai i polokalame o galuega faavaitaimi a Ausetalia ma Niu Sila, ae ia mautinoa o lo o talafeagai avanoa maua mo o tatou tagata, ia malupuipuia o tatou tagata i galuega ma e le o i ai se aafiaga tele o galuega ma pisinisi i totonu o Samoa. Ona o ia naunautaiga, ua fausiaina ai e le

Matagaluega i lalo o le taitaiga a le Soa Komiti a le Kapeneta le faiga faavae a Samoa mo galuega faavaitaimi i Ausetalia ma Niu Sila. O le faamoemoe o le faiga faavae e limataitaiina ai le faamausaliina o le tautinoga a Samoa i le auai ai i polokalame, o galuega faavaitaimi a Ausetalia ma Niu Sila faapea le faamoemoea a le Malo Samoa mo Ausetalia ma Niu Sila. E le gata i lea, o leni faiga faavae o le a toe iloilo ai le faafoeina o galuega e ptino i le filifiliin a o tagata mo galuega faavaitaimi i Ausetalia ma Niu Sila, ma toe iloilo ai maliega o lo o i ai nei ma ia Malo e lua.

O leni faiga faavae fou o lo o iloilo ai faiga faavae, o lo o i ai nei, o le faagasoloina o galuega faavaitaimi a le Vaega o galuega faavaitaimi a le Matagaluega faatasi ai ma vega o suiga o lo o fautuaina e le Soa Komiti o lo o nafa ma le iloilo o galuega faavaitaimi i Samoa. O se tasi o suiga ua faamaonia e le Kapeneta o le faasee atu lea i itumalo (Komiti o Fono Faavae) le filifiliina o i latou ua agavaa mo galuega faavaitaimi e amatalia ia Aperila 2023.

#### **Fautuaga 6:**

Faamallosia le galulue faatasi ma paaaga faava-o-Malo. O se auala lea e manatu le Komiti e taua mai ai nisi o fesoasoani mo vaega o lo o manaomia ona toe faaleleia e pei o aseta ma le faatupeina o isi galuega taua mo le faamautinoaina e atoatoa le ofoina atu o le auaunaga faatino a le Matagaluega.

#### **Tali:**

Ua faamauina e le Matagaluega le fautuaga a le Komiti. E faatauaina e le Matagaluega le fesoasoani a ana paaga soofaatasi e pei o Malo o Ausetalia ma Niu Sila, o le Faalapotopotoga Faava-o-Malo o galuega (ILO) ma le Komisi o le Tamaoaiga ma Aga Fesootea (ESCAP) le Faalapotopotoga Soofaatasi a le Lalolagi (UN) ma le fesoasoani mo Atinae (EIF) ma isi, le ofoina mai o a latou fesoasoani e auala mai i auaunaga faakonesale ma tupe i le tele o polokalame o lo o taulamua ai le Matagaluega e avea ai ma sui o le Malo i le faatinoina. Ua mafai ai e le Matagaluega ona faatauina ai aseta ma isi mea faigaluega e fesoasoani i le faatinoina o nei polokalame ma faamatuina mai e paaga soofaatasi mo le faaaogaiina pe a faamaeaina nei polokalame.

Tuuina atu ma le faaaloalo lau afioga i le Fofoga Fetalai.

**FOFOGA FETALAI:** Ia malo saunoa, faafetai i lau afioga i le Minisita. O lea ua tolaulau ia tali manino a le Malo, e tusa foi o fautuaga a le Komiti. O le mea lea malo faafetai, manaia le auiliili lelei o le lipoti, ou te iloa foi ua malamalama gofie foi i le tatou Maota.

O le avanoa lenei o se tasi e le o malamalama i le lipoti ma fia faafesili i le tatou lipoti.

Ia tulai mai le sui o Vaimauga 1.

**Afioga SULAMANAIA FETAIAI TAUILIILI TUIVASA (Vaimauga 1):** E momoli le agaga faafetai i lenei taeao i lau afioga i le Fofoga Fetalai, ma le alafai mai o le Maota Fono o le atunuu. O tatou foi o Taitai i lenei foi taeao, e tusa ai ma le aso mulimuli foi o nei lipoti faaletausagea o Matagaluega a le Malo ma Faalapotopotoga.

Ae faatalofa atu lenei itumalo i lau afioga i le Fofoga Fetalai, e matau lava ma le totoa i le vaiaso ua tuanai e oo mai i lenei vaiaso, ua tau ma lau afioga i le toatele o matou, ae toatasi lau afioga mo le faafoeina o le sa o le atunuu.

E faatalofa atu foi i lena tala na atoa, i lau afioga i le Sui Palemia Tuala, aemaise foi o afioga i alii ma tamaitai Minisita o le Kapeneta aemaise o Minisita Lagolago. Liliu mai i lenei itu Lau afioga i le Taitai o le Itu Agai aemaise o alii ma tamaitai faipule o le Palemene. Aemaise foi o le afifio o Ofisa Sili o Pulega a le Malo, aemaise o Faalapotopotoga Tumaoti.

E momoli foi le agaga faafetai i le Susuga i le Faafeagaiga ma le faletua i le molimauina o lenei foi Fonousu. E masalo o le isi tulaga matagofie lea, aua e pei e matau e susu mai le feagaiga i fafo, o lea ua alu atu ma avatu se talaave i mea o lo o tutpu i totonu o si o tatou atunuu. E tulai le sui leni lau afioga i le Fofoga Fetalai ona o le taua o le lipoti. E momoli ai le agaga faafetai i le Afioga i le Minisita, aemaise o le Taitaifono ma le Komiti na faafoeina ma tuuina mai. E momoli le agaga faafetai o lenei itumalo i le afioga i le Ofisa Sili o Pulega aemaise o le pulega ma e o lo o galulue i leni Matagaluega. E faafetai foi i le Kapeneta ua toe maua se avanoa e faafaigaluega ai le Ofisa Sili o Pulega o le Matagaluega o Leipa. Ae o le agaga fiafia o leni sui usufono ua tuuina mai le lipoti matagofie, e fai foi se sao. O tulaga foi ua aumai ai le talosaga foi a le Komiti mo le faatoateleina o le aufaigaluega, e momoli le agaga faafetai, e lagolagoina foi e le sui usufono le tulaga ina ia toe tuu le avanoa e toe maua ai nisi avanoa o le aufaigaluega pe a le o lava tagata faigaluega e faatinoina ia le Matagaluega leni.

O le faanoanoaga o le sui usufono i le tulaga o le lipoti a le Komiti, i le vaega 3.2, o lo o i ai le tala faapea, leai o se malosiaga faaletulafono e faatagaina ai e le Matagaluega faasalaga o pisinisi o lo o mataituina pea i taimi o asiasiga, e le o i ai se suiga i le tulaga o le mulimulitaia o tulafono mo le faatinoga o pisinisi. E lagona ai lava le faanoanoa, ona e pei o se Matagaluega fou foi lea i le faatinoga o faasalaga pe a maua atu ni pisinisi o faatinoina e leai ni tulaga... e pei o lea e talanoa mai i le tulafono. E pei o lou ia popolega lena, lau afioga i le Fofoga Fetalai, e pei e matau atu o lona uiga o lea na faatino lava le faatulafonoina pisinisi e faatino e aunoa ma ni

tulafono, ia le vaega lena i le lipoti a le Komiti lea e aumai. O le leai o se malosiaga faaletulafono e faatagaina ai le Matagaluega e faasala ni pisinisi. E i ai lava le manatu o Matagaluega uma lava a le Malo ma Faalapotopotoga ua i ai lava le tulaga, e tuu i ai le malosiaga lena, e fai ni faasalaga pe taofia pe faapena foi. Ae o le fautuaga lena a le Komiti e tau maua ai se malamalamaaga a le sui usufono o le Vaimauga. O le tulaga lava lena i le itu taua na matauina e le Komiti i le itulau 4 lena. E fai mai na faamauina ai e le Komiti ua i ai nisi pisinisi ua ese igoa e lesitala ai i le Matagaluega ese igoa e lesitala ai i le Matagaluega o Tiute ma... lipoti lea na uma atu, sa talanoa ai le sui usufono lenei i le tulaga o le lesitala. O le lesitala e lesitala uma lava Kamupani, e oo foi i fono faavae o tatou itumalo, ua lesitala i le Matagaluega o Leipa.

Ae toe o foi le mamalu o le atunuu, toe totogi foi laisene o pisinisi i le Matagaluega o Tupe Maua. O le agaga lea na avatu ai se talosaga a lenei itumalo, ia tasi se mea e agai i ai le atunuu. Se i tulou lava, o le Matagaluega lenei o Leipa, e o e lesitala ai Kamupani, e pei la o Sulamanaia ma Nive o lou toalua, S&N Company Limited. Ae a alu la e lesitala i le Ofisa o Lafoga, se ma faleoloa, e faaalu la i le igoa o le ma Princess Myer Utufaasisili, e pei e le taua le tulaga la e lesitala ai i luga o Leipa, ae pule lava maua i le ma Trading Name e faaalu ai le ma pisinisi. Ia te au la, e leai se tulaga leaga i le tulaga lea, e pau lava le mea ua lesitala le kamupani. Ae o le faaaogaina e tatou tagata, e oo i isi pasi lea tatou te vaai i ai, Queen Salote, Queen Caroline, e pei e faapena le agaga, ina ia sell ai le product, ina ia mafai ona omai tagata e faatau ai. Ae pei o lea o le a manao e fai foi se tulafono e ese le tulaga e lesitala ai, ia ae pei o le agaga lea na avatu ai se tuualalo i lena Faigamalo, i lo outou tulai mai, tasi loa se mea e agai i ai.

E pei o lea ou te faitau i le faigata o le faafouina o laisene, ia tasi loa se mea e o uma ai lava le atunuu. Ia tasi loa se mea e lesitala uma ai kamupani, pisinisi i le Ofisa o Leipa ma faatino ai loa le auaunaga lea. E lagolagoina e le sui usufono le tulaga lea, faafetai lava i le Minsita, o lea ua saunoa ma faatalitali foi lenei itumalo i le masina o Aperila, e tuuina atu ai le malosiaga i itumalo e aumai ai galuega faavaitaimi. E faafetai atu ai i le afioga i le Minisita, ona o i le isi malosiaga lelei lea, ona o lo o i ai pulega a alii ma faipule. E pei ona i ai si o matou alalafaga tulou lenei Maota, o lo o i ai lava nai vaega o lo o i ai e faamanuia ai. E o lava le au tauapu i fafo, pe toalima i lea masina. A o la, e matua fefefe lava i le pulega a alii ma faipule. O le taimi lava e tupu mai ai se tulaga i fafo, e te foi mai ua leai sau ato. E tuli ese oe e le nuu, i le mamafa o pulega a alii ma faipule. O lea e lagolagoina ai e lenei itumalo le vaega lea, ina ia toe faamalasia le tulaga lea.

Lau afioga i le Fofoga Fetalai e pau lena o le... o lau saunoaga e leai se malamalamaaga, e malamalama lelei le sui usufono, a o le tu atu o le faatauaina o galuega fai a le Taitaifono ma le Komiti.

O lau matau lava i lenei taeao le aso mulimuli, na amata mai i le vaiaso ua tuanai, e leai lava ni faasea i lipoti faaletausaga i le Paeaiga ua tuanai. O le agaga faafetai lena a lenei itumalo i lau afioga i le Fofoga Fetalai, i lou tulai mai ma aumai se i faafogafoga le atunuu. Aua o le isi talaave lea sa i ai, e leai ma se mea e sao i le Paeaiga sa tulai mai. A o lea ua manino le atunuu aemaise o fafo, e leai lava se mea o gase. E leai lava, e na o tupe faasili, tupe faasili e pei ona saunoa le Taitaifono. Ia manuia lau afioga i le Fofoga Fetalai, aemaise o lena Itu o le Maota i lenei taeao, aemaise foi o le tapuaiga a le feagaiga ma le faletua, aemaise o Ofisa Sili o Pulega o Matagaluega a le Malo.

**FOFOGA FETALAI:** Ia malo. Se i tulai mai lau afioga i le Minisita o Galuega.

**Tofa Hon Olo Fiti Afoa Vaai (Minisita o Galuega, Felauaiga ma Atinae Eeseese):** Lau afioga i le Fofoga Fetalai, e na o sina vaega lava. E faafetai lava i le sui usufono o Vaimauga mo le saunoaga matagofie. Aepeitai o lea ua toe lavea ifo lava le tulaga lea sa ou taua, e moni. Sa ou taua le tulaga lea i tatou lipoti faaletausaga i tausaga, masalo ua 30 i le 40 tausaga. Ia manatua foi e lau afioga i le sui usufono, o lea faatoa amata mai ina ua taunuu mai le Faigamalo lenei i le 2019, lea ua aumai i totonu tatou lipoti ia. Ina ia tatou faia le pese foi lele lea tatou te pepese ai, transparency, accountability ma le good governance. O lea la ua faatino e le Faigamalo lenei mai le 2019. Lau afioga i le Fofoga Fetalai, ua ou talanoa atu pea i le mataupu lea, ona e sao, sa avatu lau faamatalaga i lipoti e le atoatoa. O lea na logona ananafi lau afioga i le Fofoga Fetalai, i sui ia e toalua. Faafetai, sa ou tatalo i le Atua ia suluia se sui e malamalama o le Atua, ina ia auai i le tulaga lea ou te talanoa soo atu ai. E toetiiti 20 tausaga o finau pea le mataupu lenei. O le aumai le atoatoa o lipoti i totonu o le Maota. E le tuuaia la ia Matagaluega ma Matagaluega Tumaoti a le Malo, e le tuuaia foi la Komiti faa-Palemene, ae o faiga ma aga faapolokiki na fai ai le tulaga lea, e delay mai lipoti.

Ia silasila i le tele o lipoti lea e i ai nei, e leai ni audited accounts i totonu, ae a tatou palasi loa la i le Tulafono Tumau o le Maota e pule ai lau afioga, i lalo o le Vaega 33, e manino mai i ina taiala o galuega faa-Komiti faa-Palemene. E silasila i Tulafono, ma faiga faavae a le Malo po o mulimulitaia i ai Matagaluega a le Malo i le faatinoga o latou galuega.

Ma le mea mulimuli lau afioga i le Fofoga Fetalai, o le auiliili lelei e Komiti faa-Palemene o tupe maua ma tupe faaalu a so o se Matagaluega. O le ala lea na ou fai atu ai, e le o ato le faiga o le galuega, e le o aumai ato i totonu ia faamatalaga ia, ina ia faia ai le galuega a Komiti faa-Palemene. O le latou tautiga, ae le o ato, talu ai, le ala lea lau afioga i le Fofoga Fetalai. Ou te tatalo atu ai, sui, tafi i fafo aga faapolokiki ia mo le delay tactics, sa faia e le

Faigamalo talu ai, tatou alu ai loa i i, i le taimi lenei. E pei o lau tu atu lena e faaali atu le tulaga lea, ae faafetai o la ua tali le Atua i lau tatalo, ua sului ia sui usufono ia e toalua ananafi, i le malamalama o le Atua. Faafetai.

**FOFOGA FETALAI:** Tulai mai lau afioga i le Taitai o le Itu Agai.

**Tofa Hon Laufo Fonotoe Nuafesili Pierre Laufo:** Lau afioga i le Fofoga Fetalai, ou te tulai atu e tusa ai ma le lauga e matua sese tele lea na faatoa mavae atu nei. O lipoti faaletausaga, e maea le Paeaiga na tea nei, ua atoa uma mai i i le Ofisa o le Fono, atoa uma mai lava. E pau lava le mea lea na faaaletonu, e le i maua se avanoa e aumai ai i totonu o le Maota, aumai i luga o le Order Paper mo le talanoaina. O lipoti la lea ua tatou oo nei i ai. Ae sa oo uma mai lava lipoti iinei i le Ofisa. Ae ona o le faagasologa o galuega, na mafua ai ona tuai ona oo mai i totonu o le Maota. O lea foi e atoatoa lava mea uma, e leai foi ni mea o delay tactics, ia o le a le mea e maua i lena mea o le delay tactics, e tuai...ma le isi mea, o lena e silafia e lau afioga i le Minisita, e tuai le oo mai o lipoti, e oo mai lipoti ua leva lava ona malamalama uma le atunuu i galuega la e faatino e Matagaluega ma mea la e tutupu i totonu o galuega a le Malo, e leai lava se mea o lilo, e leai foi se mea o natia. O le tulaga foi o financial statement ma le audit ina o mea nei, ia manatua foi o mea na sa sau i aso la, o lipoti a Matagaluega, e le aumaia ai ni financials. E vagana la le taimi lea lata mai, e masalo na maua mai e taua po o le 2006 pe a, lea na fai ai teuteuga i le Management Public Finance Act, lea na mafua ai ona toe fetuunai ia tulaga ia.

E oo mai lava i le aso, manatua foi aua ne i galo i lau afioga, o lea lava e i ai le lipoti a le okika, o lea e aumai. O lea tatou te le i oo i le lipoti a le okika, o le okika na te okika ina uma lava galuega account a Matagaluega a le Malo. A i ai la ni faaletonu, o i ina la e sau ai mea faaletonu, e sau i totonu o le lipoti a le okika. O le tulaga lena mo le silafia e lau afioga.

**FOFOGA FETALAI:** O lea ua maua atu o le a tatou see ese ma le lipoti a le Komiti.

**Tofa Hon Laufo Fonotoe Nuafesili Pierre Laufo:** Ua lelei lau afioga, ae pei o le tali atu lena, e faasao ai le saunoaga a le afioga i le Minisita.

**FOFOGA FETALAI:** Se i tulai mai lau afioga i le Minisita.

**Tofa Hon Olo Fiti Afoa Vaai:** Ua matua ou alofa lava i si ou uso, le Taitai o le Itu Agai, i le leva ona i ai i totonu o le Palemene, sa Minisita foi, sa Sui Palemia. O le tulaga lea ou te talanoa atu ai, o le taimi e Iloilo ai lipoti a le Komiti, e tataua ona atoa i totonu ma accounts. O lena ua i ai i totonu o le



latou iloiloga, ina ia atoa mai le latou lipoti i totonu o le Palemene. Lau afioga e le o i ai ni accounts i totonu. O le ala foi lena na ou fai atu ai, e le o talafeagai ma o faatasi ia upu ia ma faamatalaga i totonu o lipoti, leaga e le o i ai ni fuainumera o i ai i totonu.

Ia silasila lau Afioga i le Fofoga Fetalai, mea ia project a le Malo, project tetele tai fia sefulu miliona a le Malo o silasila ai le Maota i le faaaogaina e le i silasila I ai le maota i le auiliiliina o le faaaogaina o le \$20 miliona, \$30 miliona o isi mea \$50 miliona. O le matafaioi lena o le Palemene, o le silasila totoa lava a i tulaga ia pe faafefea ona faaoga mai e le faigamalo tupe ia, o le mea lena ou te faanoanoa ai tele i le Taitai o le Itu Agai, matuai ou faanoanoa lava i ai. Ae faafetai na o le 2 sui a le la itu na oo i ai le malamalama o le Alii faafetai.

**FOFOGA FETALAI:** Ua iai le manatu o lau Afioga i le Taitai o le Itu Agai faamalulu atu ona o le a tatou see ese ma le tatou lipoti o loo talanoaina ae afai e te lua fetalai ma le Minisinta. E alu lenei aso o lua fetalai ae malilie ia malilie ia leaga e tatau a ona o le Itu a le Malo e mulimuli tali i se fesili e tatau ona faamalieina lou finagalo lau Afioga i le Taitai o le Itu Agai.

**Tofa Hon LAUOFO FONOTOE NUAFESILI PIERRE LAUOFO (Taitai o le Itu Agai):** Ae sei talia lipoti a le Afioga i le Minisita sei aumai tatou talanoa loa lea i lipoti lena .

**Tofa ALE VENA ALE (Faleata 4):** Lau Afioga i le Fofoga Fetalai ua ou tulai atu ma le faaaloalo pe maua se avanoa .

**FOFOGA FETALAI:** Malo faafetai i le sui mai Vaimauga 1 e faamalulu atu i sui mamalu. O le uiga o le faamatalaga a iai se mea e leo malamalama i le lipoti o le taua lena ae leo faapea ina nei tei ua sese le faaupuga o le nofoa ia o le le malamalama. Ae ole agaga a ia o le nofoa o le lipoti o la e aumai atoatoa ae o iai la se mea o le lipoti e leo manino iai pei o le uiga lena ae ou te fiafia i le sui lea mai Vaimauga 1 e agai sao a i totonu o le Lipoti, ma faapiipii mai ai o nai ana isi mea foi. O le taua lena o le sui lea o le mea lea faafetai o le agaga tonu lea o le agai sao i tatou lipoti e vave ai foi le tatou galuega, ae sei tulai mai lau Afioga i le Igoa Matua Faleata 4.

**Tofa ALE VENA ALE:** Lau Afioga i le Fofoga Fetalai ou te tulai atu o au na ou fia lauga i le lipoti lea ae lea la pisa le au alii lea i le lipoti faafetai lau Afioga i le Fofoga Fetalai. Ia ou te faatalofa atu i lau Afioga i le Fofoga Fetalai i lenei taeao tatou iai faatasi ma lau Afioga i luma o Atua le faamanuina o lona suafa Paia ae ua alafai mai lenei Palemene i le soifua manuia mai le Atua i lenei taeao. Ou te faafeiloai atu foi i le paia tele o lenei

maota aemaise le tapuaiga o tatou Nuu. I ou paia faaleatunuu, paia faalemalo aemaise o ou paia faaleekalesia le afio o Faafeagaiga Taulagi o loo faanonomanu i le Atua tapuaia faia o le tatou Palemene aua le tatou usugafono i lena vaiaso ma lenei foi vaiaso. Faafeiloai atu foi i le paia tele o lenei Maota i lau Afioga i le Sui Palemia faapea foi Minisita o Kapeneta , Minisita Lagolago, faapea foi lau Afioga i le Taitai o le Itu Agai faapea foi sui mamalu uma o lenei maota, Ofisa Sili o Pulega o Matagaluega. Malo lava le tauatai, faafetai foi le tautuaina o le tatou Malo. Faafeiloai atu foi i lau Susuga i le Faafeagaiga, si au uo mamae a lea o le Susuga ia Taeauga Lopati, ou te iloa e ala ona auai mai le Faafeagaiga o le fia faalogologo i tatou Taulumaga o le Palemene ae faafetai lenei taeao. Lau Afioga i le Fofoga Fetalai e avea lenei avanoa ou te momoli atu ai le agaga faafetai tele lava i le lipoti ua tauaaoina mai e le Komiti ma e o lea foi ua saunoa ia sui o le Vaimauga i se mataupu sa ou fia agai i ai. A matauina foi e le tatou Palemene i fatia ua alu foi Taulumaga o le tatou fonotaga i aiaiga ma tuutuuga lea ua aumai e le Afioga i le Sui Palemia, e toe tapa ai nisi o taiala e mataituina ai ia lesitalaina o Pisinisi. Lea ua ou manao e aumai tonu a tagata e ona pisinisi, aua o le mea lea e i ai i le taimi lenei. E ese le tagata e ana le pisinisi ese le tagata lae run ina le pisinisi, ae faafetai o lea ua saunoa manino le Afioga i le sui Palemia ma o lea ua agai tonu a le Matagaluega ina ia faatino le tulaga lea . Ma e momoli ai le agaga faafetai tele e tusa ai male lipoti aemaise o fautuaga . Ona ou oo mai lea lau Afioga i galuega ia faavaitaimi.

Lau Afioga i le Fofoga Fetalai e le taumateina le tele o faafitauli o loo feagai ma o tatou tagata. E pei foi ona tautalagia i le tatou Fonotaga talu ai ina ia silasila totoa le tatou Malo i Konekarate ma le faafaigaluegaina o tatou tagata. Ae o le isi faafitauli ua aliae mai ona o le leai o se fesootaiga o tatou tagata i ni o latou faafitauli. E fautuaina le tatou Malo o la e i ai lo tatou Ofisa Konesula i Aukilani, faapena foi le Ofisa Autu i Ueligitone e tatau lava i Ofisa nei. I lau ia lea fautuaga ina ia momoli i ai o tatou... ona deal lea o latou ma faafitauli nei. Ma e lagolagoina e le Itumalo lenei le faamatuuina atu i Nuu ma Itumalo aemaise le filia mai o tagata faigaluega. Ona o la e mataitu e silafia lelei foi e Afioga. Ma o le taimi lava e momoli mai ai le tagata e avea ma tagata e faafaigaluega i galuega faavaitaimi o le a ave i ai le upu malosia a le Nuu. Ma e le mafai foi ona alu e faaletonu lona auai i o. A o faafitauli ia e tutupu mai o, e le o iai se control lelei, tasi a le tala a le Nuu ia e alu ma lou mautinoa, e toe iai loa se mea e tauvalea ai le Nuu ona e vaai loa i ai. O le a soloa oe ma le aufuefue ma lea ma lea nisi tala o mea na e tatau ona fai. E matua lagolagoina lava le faamatuu atu o galuega faavaitaimi. Faafetai lau Afioga, ia tapuaia foi le sii gasegase a le Afioga i le Minisita fitoitonu ma le Matagaluega lea, se tasi foi o lenei Itumalo le Tofa ia Leatinuu Soosialo. Tatou tapuaia lana siiga gasegase. Ou te iloa o loo

maua mai tala o loo manuia, a o taimi faatulagaina e le fomai e tatau ona toe foi mai ai. O le mea lea i lenei taeao lau Afioga i le Fofoga Fetalai, ua matua manino atoatoa le lipoti ma e momoli atu le agaga faafetai .

Ona ou oo ai lea i lou itumalo, faamaea atu ai Lau Afioga i le Fofoga Fetalai. Momoli atu le faafetai tele lava i le tapuaiga a si ou Itumalo Faleata 4, le Afio o Ale ma Ulu ma o la aiga ma le Nofoaote ma le Itulua ia Sa Tunumafono ma leTofa le Vaa o Ulu, faapea foi le alo o Tuitoga ma le Falesatalaua, faapea Lauaki ma le Motuopuaa. Ua ou tuai mai nei le taeao o lea sa fai nei le fono a le tatou Komiti ma o taeao lea o le a asia uma ai tatou poloketi uma a le Afioaga o Saina taeao, ia 9.00 o lea la alu atu ai ma le sui usufono. E maua mai loa ma screen uma tatou lipoti alu atu loa i tua le tatou tupe alu loa ma issue siaki aua le miliona lea. Lea ua uma ona ou tautala i le fono a le tatou Komiti ananei i le taeao, ia faatauaina fuafuaaga a le Malo. Aua tou te faalogo fua i nisi gasu e faatauaina le finagalo o le Malo, taeao o le a asiasia ai le Afioaga o Saina faasolo atu ai lea i Toamua ma Toamua Uta. Ia manuia tele le fonotaga a le tatou Palemene i lenei taeao faafetai .

**FOFOGA FETALAI:** Malo faafetai, malo mo le sao aemaise foi o le lagolagoina foi o le tatou Lipoti, aemaise o lea foi ua saunoa tonu le sui i lea foi ua manino atoatoa lana vaai i le lipoti. O le mea lea malo faafetai. Aveese lenei upu o le le malamalama ae tuu loa iai le upu lea o le le manino faigofie lena. Ia sei tulai mai le sui mamalu mai Sagaga 2.

**Susuga MAULOLO TAVITA AMOSA (Sagaga 2):** Faafetai mo le avanoa lau Afioga i le Fofoga Fetalai. Ou te manatu foi lea ua taaoto faatuluma na momoe faatasi i le lagi tatau sa ma faiga o Samoa ma lenei maota, pei ona e saunoa ma papae i le taimi ua sola. O nei itu aso ou te manatu e leai a se isi sui e toe fia faafofoga i ni mea uumi. O le tali a le malo fautuaga lona 5, lea o loo faapea mai o le faasee atu le filifiliga o sui ia o le RSE foi lea i tua o Komiti Faavae. O se fuafuaaga manaia tele pau le faafesili faafefea tulaga o aulape? Taoto atu foi i le Fono Faavae le Komiti Faavae e pule latou po o se mea e tapena atu e le Kapeneta, Malo ina ia laugatasia uma ai le atunuu? Pau a lea o si au fesili ma le faaaloalo lava.

**FOFOGA FETALAI:** Malo faafetai, malo lava le lagolago mai i le tatou nofoa. O lea ua agai sao a le lipoti, o lea ua faafofoga mai le Minisita se taimi o i luma e iai se taimi saunoa mai le Minisita se taimi saunoa mai le Minisita faamanino lea tulaga ma le Taitaifono, se i tulai ia le sui usufono tamaitai mai Alataua i Sisifo.

**Afioga ALIIMALEMANU MOTI MOMOEMAUSU ALOFA TUUAU (Sui Usufono Tamaitai - Alataua Sisifo):** E faatalofa atu i lau Afioga i le

Fofoga Fetalai faapea foi lena itu o le Maota, lau Afioga i le Sui Palemia o Minisita o le Kapeneta. Faatalofa atu foi i Minisita Lagolago, o si matou Itu Agai, sui usufono uma o lenei Itu faapea Samoa ua potopoto mai i lenei taeao, faapea foi Ofisa Sili o Pulega o Matagaluega ma Faalapotopotoga aemaise foi Samoa o loo faafofoga tapuai mai. Tulai atu e fai sina manatu i le lipoti. E muamua ona avatu le faafetai i le Afioga i le Minisita o Galuega i lana faaeaea i o ma sui usufono e toalua lea na agai mai ai lana saunoaga. Faafetai a le faaeaea i lau Afioga faafetai, foi le taufaasee o lau pule lea, faafetai pe a ua i ai se aoga o le fautuaga faaleleia atili ai le tatou galuega e fai faatasi. Atonu foi o lena vaitaimi sa le i i ai ni tulaga maaleale sa i ai ia tulaga i le faiga o tatou lipoti ae faafetai o lea ua maua ia avanoa i lenei vaitau e talanoa auiliili ai. A o lau fesili uiga i le mataupu lea, faafetai lau Afioga i le Taitaifono faapea le komiti aemaise foi le Matagaluega e ona le lipoti o lau fesili i le itu lea o pisinisi, mo Tina ma Tamaitai. Ona o lea e matau atu o taua ai se vaega tupe mo le atinaeina o pisinisi mo tina, matau atu e le o se tupe e \$27,000 tala Amelik. O le fesili e fia ni Tina ma ni Tamaitai o le tatou atunuu ua faamanuiaina ai i lea vaega tupe? Ona oo mai lea ma le isi fesili. Lea ua taua na o le 66.7 le aofai o falefaigaluega o loo usitaia aiaiga o le tulafono o le saogalemu ma le soifua maloloina. O lau fesili la, o a ni a tatou tuutuuga a o le a foi le taimi faatapulaa ua tuuina atu i e e le o ausia ia tulaga ia tulaga ia Soifua Maloloin. E i ai se taimi ua tuu i ai ia oo atu iai ua tatau ona latou usitaia ia tulaga ia i le soifua maloloina a le aufaigaluega. Ma le tulaga mulimuli, ia pei ona taua e le sui a le Vaimauga tulaga lea i pisinisi o le laiseneina o tatou pisinisi. Atonu o totonu o le Matagaluega o Pisinisi Alamanuia ma Leipa, o lea e i ai uma ma le lesitalaina o Asosi, o Sosaiete, o Faalapotopotoga (Non-Profit Organizations) lea la iai foi ma le Pisinisi ma le laiseneina o Pisinisi, pisinisi e maua ai tupe. Na i ai lea o se lagona e tau pipiitia ai le saunoaga a le Afioga i le Vaimauga le sui mai Vaimauga.

O se tuualalo aumai loa iai ma le vaega lea e lesitalaina vaega tau pisinisi e tuu faatasi uma ai i i i totonu o le Matagaluega, ona atoatoa ai lea, ese vaega e lesitala ai Asosi ma Sosaiete ma Faalapotopotoga e pei ona maua i nisi o saunoaga, ese foi le vaega tonu o mea tau pisinisi e maua mai ai tupe. O se tala lena ma le faaaloalo, faafetai mole avanoa.

**FOFOGA FETALAI:** Malo faafetai, malo le saunoa, sei tulai mai le sui o Vaimauga 2.

**Tofa LENATAI VICTOR FAAFOI TAMAPUA (Vaimauga 2):** Faafetai lau Afioga e tusa ai mo le avanoa a lou nei sui, manatu e fia faaoga foi lenei avanoa e faatalofa atu ai foi i lau Afioga i le Fofoga Fetalai tainane le afio o le Sui Palemia, nofo a Minisita o le Kapeneta tainane foi le Afio o

Minisita Lagolago. I lenei foi itu o le Malu afio le Taitai o le Itu Agai aemaise sui mamalu uma o le fono usu a le tatou atunuu. Faatalofa atu foi i le susuga i le Failautusi, Sui Failautusi aemaise le Ofisa o le tatou Fono, faatalofa atu foi i le tamaitai Loia Sili aemaise Ofisa Sili o Pulega o Matagaluega ma Faalapotopotoga aemaise foi Ofisa Sinia ua mafai ona tatou ofaga potopoto i lenei taeao. Mamalu foi o le atunuu malo lavale soifua maua ma le soifua laulelei ua mafai ona tatou faatasi i lenei taeao.

Lau Afioga i le Fofoga Fetalai talitonu o se mea e ao ona faatino, e pei ona e saunoa foi le Afioga foi o le Minisita o Aoga i le aso ananafi e fai taliga o aupa. O lea ia e fia faaoga foi lenei avanoa ou te faatalofa ma faafeiloai foi i le sui usufono o Vaimauga 3, pei ona silafia e lau Afioga aemaise foi o le tatou maota nei, e eseese Itumalo ae pei o le manava e tasi sei tulou e omai ai. I le Afio lea o le Matua ia Tofaeono, Afio Asi ma Patu, Afio Aiga e Tolu, Afio le Usoalii, Alalatai Tamapua ma Manogiamanu le mamalu le nofo Ituaiga ia Fuata tainane ia Ataga ma Sataga, o la tatalo ia faamanuia le Atua i lou tulai mai aua le tautuaina o le tatou Nuu aemaise le tatou Itumalo.

Lau Afioga i le Fofoga Fetalai manatu e le faaumia se faamatalaga i le tatou Lipoti. Pau o lea o le agaga faafetai, Taitaifono, Sui Taitaifono aemaise le mamalu o le Komiti, faafetai foi i le Afioga i le Minisita ma le Matagaluega o lea ua aumai le talifuaitau e tusa ai ma fautuaga e pei ona aumai e le Komiti. E manatu foi o lea le faaumia se faamatalaga o nisi o vaega sa fia laga o lea ua saunoa ai foi nisi o sui, ua manino ma malamalama . Pau a lea se tuualalo i le fautuaga 5 aemaise le tali a le tatou Malo. O lo o lata mai Vaimauga Nu e amata ai le roll out o le tatou Polokalame lea mo galuega Faavaitaimi ma le faaaloalo lava, ia manuia taualumaga o totoe o le tatou Fono.

**FOFOGA FETALAI:** Malo faafetai saunoa i lau Afioga i le sui mamalu mai Vaimauga 2, malo a lea ua tautino le fesoasoani a le Itumalo aua lava tatou galuega faavaitaimi. Ia talu ai o lea ua tatou oo mai i le tatou taimi malolo o le taeao, leaga o lea sa fetaliai le Minisita o Galuega ma le Taitai o le Itu Agai i mea nei o Lipoti a Matagaluega. E lelei foi lou tago e faitau atu le tulafono lea ona faavasega mai lava lea e outou poo ai e sao. O le tulafono lea o loo manino i le Pulega o Tupe a le Malo, i le tulafono lea 110, “O lipoti a Matagaluega, Lipoti Faaletausaga e manaomia i lalo o soo se tulafono. E ao ina tuuina atu e se Matagaluega, o le a tatau ona aofia ai i totonu ia faamatalaga tatau e faatatau lena Matagaluega mai faamatalaga o Tupe Maua ma Totogi e manaomia e le faamatalaga 5, lea la e auiliilil uma a e le faamatalaga 5 mea uma. E tatau i le Failautusi o Tupe ona faamaonia le faamatalaga o loo iai i totonu o faamatalaga o Tupe e avea ai o se ootoga moni mai faamatalaga o Tupe. O lena ua faamanino atu lea vaega leaga o lea sa talanoa ai le Taitai o le Itu Agai ma le Minisita e uiga i le tatou

Tulafono. O le mea lea o le a faataatiaese tatou galuega mo le tatou malolo masani o le taeao.

*Na faataatiase Taulumaga o le Fono Aoaofaitulafono mo lana malologa masani i le itula e 10:48 i le taeao ma toe amatalia i le itula e 11:20 i le taeao.*

**FOFOGA FETALAI:** Ou te faasilasila atu ua toe amatalia nei Taulumaga o le Fono Aoaofaitulafono. Faamalo le onosai i le tatou Maota, e le o toe tele se tatou galuega o totoe e iai le manatu ua maea pale auau le taliagasua o le tatou Maota faafetai i le Atua i lana foai, maua foi se faasiligamalosi e faaauau ai galuega o lenei aso. E faataatiaese tatou taulumaga mo le malologa o le taeoa ua maea le saunoaga a le sui usufono o Vaimauga 2. O le avanoa lea o le Sui Tootoo lea mai Falelatai ma Samatau ma ou te iloa foi o le tatou tootoo mulimuli lea o lea lipoti.

**Afioga LUPEMATASILA GALUMALEMANA TOLOGATA TOGIA TILE LEI'A (Falelatai & Samatau):** Faafetai lau Afioga i le Fofoga Fetalai manatu foi o lea ua saoi le taliga o le malu taeao lau Afioga i le Fofoga Fetalai ma le paia maua o lenei maota. E momoli atu ai le agaga faafetai tele i lau Afioga faapea foi le Failautusi ma le tatou Ofisa o le Fono. Ae ona o le tatou taimi o loo tau faauma ai tatou galuega ae lei oo atu se manatu puupuu o lenei Itumalo i le Lipoti e pei ona opea i luma o le maota, ou te fia faaogaina lenei avanoa e avatu ai faamaisega I aiga ma nisi o matou pitonuu i Samatau. I le Lagia o le Maota i Fagafeuo Maota foi e afifio ai le Falefa o le Usoalii, Fiamē ma le Gafa, Usuia foi le fonofono i Niuapai ma Laoa faitauina o si o tatou Nuu. Le valaau paia a le Atua le Fetalai ia Fanaea faapea foi le Tina Matua ia Letifuga Tuua o le matou tatalo ia maua lau Susuga i le Faafeagaiga le Susuga ia Livingstone Toelupe faapea foi le tatou Ekalesia ma le tatou Nuu le faamafanafanaga a le Atua.

Na ou oo mai lea i le lipoti lau Afioga ile Fofoga Fetalai e puupuu a se manatu a lenei Itumalo. E pei ona silafia e lenei Maota Itumalo lenei o Falelatai ma Samatau na muaimalae i le polokalame lenei o le galuega faavaitaimi, lea sa tuuina atu ai e le tatou Malo lea foi faamanuiaga, matau foi ma le agaga fiafia ma le agaga faafetai tele nisi o Itumalo o Aiga foi o si tatou atunuu ua manuia i lenei polokalame taua ma le matagofie. Faafetai o lea ua matau atu ua iai se fuafuaaga a le Malo e tuuina atu i tua i Itumalo ia le filifiliina mai o alo ma fanau e o i le tatou Polokame lea o le RSE. O se faiga lelei ae pau si tuualalo a lenei Itumalo e tuu atu pea i tafatafa o lau Afioga i le Minisita ma le Matagaluega ma le Malo e le gata e tuuina atu le

filifiliina o tamaiti e o i galuega faavaitaimi. Ae pei e manaia foi le tuu atu atoa avea Itumalo e 51 o le tatou atunuu e fai ma Agent o le polokalame lenei o le polokalame lenei o le galuega faavaitaimi. E le na o le filifiliina mai o alo ma fanau a Itumalo e o i le poloketi ae manaia le tuuina atu atoa iai i Itumalo ia 51 e avea latou ma agents e faafaigaluega ia mamalu o le atunuu alo ma fanau ma iai foi so latou sao i le faiga o konekarate ma ma faamanuiaga o alo ma fanau o le tatou atunuu. Pei e manaia a le taulamua le sui usufono, o ai lava le sui usufono e tulai mai lea taimi ma lea taimi. O lea ua amata le tatou Komiti faaitumalo ae a involve le sui usufono i le polokalame lenei vaavaalua ma le fesoasoani a le tatou Matagaluega ma le Malo. E i ai le manatu maualuga o lenei Itumalo o le a le taumate le sologa manuia o lenei foi polokalame taua ae pei e pau na o se tuualalo ina ia mafai ona aofia ai le Sui Usufono ma tuu atu e faa-agents ia Itumalo ia e 51, ae fesoasoani i ai le Matagaluega ma le tatou Malo i le faiga o feagaiga. Mafai foi ona alu le sui usufono i fafo e vaai le mea o loo galulue ai alo ma fanau o le Itumalo. E i ai foi ni faafitauli e tulai mai fafo, e iai le manatu o le sui usufono e tatau ona vili mai ai , e le gata o le kamupani lae galulue ai ae tatau foi ona vili mai fesootai mai o le sui usufono e alu e fesootai i le Matagaluega ma le Minisita ma le Malo ina ia vave ona maua fofo o le faafitauli e pei ona tulai mai. Pei o se manatu puupuu lea o lenei Itumalo ae manuia tele toe taimi o totoe o le tatou fonotaga.

**FOFOGA FETALAI:** Malo saunoa i le tatou sui mamalu, faafetai foi mo le faasoa, tulai mai le sui o Lefaga ma Faleaseela.

**Afioga MASINALUPE MAKESI MASINALUPE (Lefaga ma Faleaseela):** Manatu ua faautagia, ioe faamolemole lea sei taumafai atu le sao o lenei usugafono. Faafetai i lau Afioga i le Fofoga Fetalai, e le umi lava se faamatalaga. Ae momoli le faafetai i lenei taeao i le taitai saogalemu mai o le soifua ma le ola aua le faaauauina o le tatou Fono mulimuli. Tau faavavevave atu se manatu o lenei usugafono. O le fautuaga 1 e pei ona aumai e tau avatu ai se tuaalalo. O lea e maua atu i nisi e pei ona saunoa i le tulaga e pei ona i ai le avatu i le MCIL e faatinoina le tulaga o Laisene o pisinisi. A o se lagona e fia faataatia atu i lenei itula ou te manatu i le MCIL o le Immigration ma le Customs and Revenue e tatau ona galulue faatasi, ma ia maua le mafutaga foi lele soosoo faatasi i informations. O le uiga o le faamatalaga aua e tatau ona maua se malamalamaaga o le MCIL ile tagata e agai mai fafo i totonu o si o tatou atunuu. O le Immigration la e tatau ona aumai ai le faamaoniaga poo lea le umi e nofo mau ai pe alala ai le tagata le sau mai fafo i totonu o Samoa. E le gata i le isi itu lea a o le itu foi lea i totonu o faamaumauga e avatu e le MCIL ina ia limataitaiina ai le faatinoina o le pisinisi. Afai o lea e iai finagalo o se isi le faafaigata i le taimi lenei ,

pau a le agaga le iai i le Afioga i le Minisita o pisinisi fou aua e le o ma iloa tagata e pei ona i ai ia atugaluga o isi. E ese le tagata o lea agai mai e faatino le pisinisi ese le tagata lea lesitala ai. O le uiga lena, o le a taatia ia pisinisi tuai ua leva ona faatino ae pei o le agaga lava lea o lea e tau aumai pei o lea tau avatu ai se fesoasoani tulaga lea ina ia femalamalamaai ia Matagaluega ia e 3. O le MCIL, Immigration faapea foi le Customs ma le Revenue ina ia fesootai ona faafaigofie ai lea o fuafuaaga uma malamalama le MCIL ma tagata o loo malaga mai faapea le faatinoina o le laisene pisinisi. O le tulaga e pei ona i ai le fautuaga 5, e maua lava ia tatou galuega faavaitaimi i Niu Sila ma Ausetalia, o Niu Sila lea e lelei a le tulaga e pei ona iai, maua le fesootaiga, lelei le discipline o le au galulue. Aepeitai o Ausetalia, ai ona o le uumi o taimi e galulue ai, pei o le afaina lena o lea iai toe tele le atunuu e le o maua e sui uma se fesootaiga e faatino ai, ia lelei le faatinoina o galuega. Ia na o le tuualalo auala atu lau Afioga i le Fofoga Fetalai pe mafai ona fetuutuunai ae ia tutusa ia taimi o le piriota e faaogaina i Niu Sila faapea foi Ausetalia, aua e pei e foliga o le umi o le taimi, o le tele foi lea o faafitauli e feagai ai ona o le umi foi e le i toe vaai i le atunuu.

A o le agaga lava ia pei ona i ai, pei lava o si o tatou atunuu, a faatulaga lava le taimi po o le 7 i le 9 masina, ua lava lena i lo le 3 tausaga lea e i ai, ia ua umi tele. Ia na pau lea o nai motugaafa e molimoli atu aua foi le fautuaga ua faaoo mai, ae momoli tele le faafetai tele i le Taitaifono ma le Komiti faapea foi le Afioga i le Minisita mo le lauliliuina o lenei foi Lipoti matagofie, ia o lea ua taatia i le Fono nei.

Ia manuia tele lau Afioga i le Fofoga Fetalai, faapea foi le mamalu maualuga o le tatou Palemene.

**FOFOGA FETALAI:** Ia, tulai maia lau Afioga i le sui usufono mamalu mo Aana Alofi 2.

**Afioga AIONO TILE GAFA (Aana Alofi 2):** Lau Afioga i le Fofoga Fetalai, faafetai mo le avanoa o lenei foi usugafono ma lenei itumalo e tulai atu ai ma le faaaloalo, e laitiiti lava si manatu e fia faaalua i le Lipoti a le tatou Matagaluega e pei o le galuega a le Komiti.

E faatalofa atu ai i lau Afioga ma le mamalu o le Maota, aemaise foi o lenei taeao i le usugafono a Samoa. Malo le soifua ma le lagi e mama. E faapea foi le paia o le saofaiga a Ofisa Sili o Pulega o Matagaluega ma Ofisa o le Malo, malo le galulue.

E faapea foi i lea talaga aua le susuga i le faafeagaiga ma le faletua ia o le tama tau Satuala faapea foi le faletua.

O le agaga faafetai i le Lipoti ma le galuega a lau Afioga i le Taitaifono ma le Komiti aemaise lau Afioga i le Minisita.



O le vaega lea ou te fia talanoa i ai lau Afioga, o le vaega lea, e moni lava o le au tau fualaau ma le au tau apu ma tulaga faapena, a o le tulaga lea i le tau tausi matua lea e patino i Ausetalia. O lea ua i ai le finagalo pei ona taoto o lea o le a faaoo atu i le tatou Ofisa i Fono Faavae i tua mo le filifiliga o tatou afaigaluega.

Ae pei o le tulaga lea e fia malamalama ai, o le filifiliga o le vaega lea, aua o lea lava tatou te iloa ma silafia ma malamalama, ia o galuega faavaitaimi ia e patino lava i le au tau apu ma le au tau aniani ma tulaga faapena, e pei e faigofie lava. Ae pe o le a se fuafuaga i le filifiliga o i latou nei e o e vaai tagata matutua i le falemai o le aumatutua. Po o i ai ni tulaga e fia malamalama ai foi lenei itumalo, aua foi ou te iloa e toatele lava foi nisi o latou e le o silafia lelei le tulaga lea. O lea lava e faitau na o le e tau apu ma o e tau fualaau, ae pei o lea e i ai le isi vaega lea, ia ou te iloa e toatele lava foi e agavaa i ai. A o le tulaga ina ia i ai ni... o a ni tulaga e moomia po o se tulaga foi lele e faapea e i ai sona malamalamaaga i tulaga faafomai po o tulaga faapena, ia e lelei lava le faamanino ina ia oo i le taimi e filifili ai, e o atu e mananao e fia malaga i vaega lea a o i ai ni tapenaga mo lea faamoemoe.

Ia pau lea lau Afioga i le Fofoga Fetalai, ia manuia tele le Fono a le atunuu.

**FOFOGA FETALAI:** Malo saunoa i lau Afioga i le sui usufono mamalu mai Aana Alofi 2.

Ia, se i tulai mai le sui usufono mo Faasaleleaga 5.

**Afioga PESETA VAIFOU TEVAGAENA (Faasaleleaga 5):** Faafetai lava i lau Afioga i le Fofoga Fetalai. Ia e puupuu lava se manatu o lenei itumalo, ona tasi lenei mataupu sa ou laga i tulaga foi nei tau pisinisi laisene Lea ou te fesili sao atu lava i lau Afioga i le Minisita, ona o le tulaga lea ua poloka ai le tele o tatou pisinisi laisene i le taimi lenei. O le mea lena e lelei lava lou faafesili atu ina ia malamalama le tulaga lea. Afai o le pisinisi ua uma ona resitala, o ita o le tagata Samoa moni lava, a o le fafine ma le fanau e omai mai fafo, a o lea la ua aveese lota igoa foi lea ma shareholders and Directors of Company, a o lea ua toe nei o le fafine. E pei e foliga mai i le tulaga lea ua tulai mai, pei o lea o le a tau la e le Matagaluega o mea o foreign investors. Ae pei o le agaga lena o lea ua ou fesili sao atu ai, ne i eseele la le treat maiga o le foreign investors company ia ma kamupani na ala ona oo mai o ita, o lota toalua ma lata fanau. A o lea la ua toe nei o le fafine ma le fanau lea e resitala ai le kamupani. O se tulaga foi lele e lelei lava le faamalamalama o le tulaga lea, ona o lea ua oo mai le taimi lenei ua poloka uma ai laisene pisinisi i le tulaga lea. E lelei pea le faamalamalama o le tulaga lea lau Afioga, ina ia manino le Matagaluega i le mafuaaga na ala ai ona resitala le kamupani.

Ma lou faaaloalo lava lau Afioga i le Fofoga Fetalai.

**FOFOGA FETALAI:** Malo faafetai. Ia, atonu o se taimi tali atu le faafesili a lau Afioga i le sui usufono mamalu.

Tulai mai lau Afioga i le Taitaifono mo le tali foi o nisi o mataupu sa laga e sui usufono mamalu.

**Afioga NIUAVA ETI L. MALOLO:** Faafetai i lau Afioga i le Fofoga Fetalai. E manatu o lea ua maea paleauau foi le taliga o le malutaeao i le paia foi o le Fono mamalu, aemaise foi le tatou Fonotaga i lenei taeao.

Ae ou te tulai i le ava, e tautala foi i le agaga o le faaaloalo e talifuaitau foi i nisi o mataupu e pei ona laga e sui usufono mamalu o le Palemene. Ae le i tuuina atu se tali faafesili, e muamua lava ona momoli le agaga faafetai i le sui usufono mo Vaimauga 1 le Afioga ia Sulamanaia. E moni ua uma lelei lava Lipoti o le tatou Fonotaga lenei e le i tuuaunoaina lava e le sui usufono mamalu le tulaga o le faafesili ia ma fautuaga foi. E momoli le agaga faafetai, e aoga e limataitaiina ai le agai i luma o nei Lipoti.

A o le tulaga e pei ona faafesili muamua le sui usufono i le vaega lea e 5 e pei ona aumai ai, ou te faamalulu atu i le Afioga masalo o lena e avesese, e le o se fautuaga a le Komiti, a o luitau. Tasi lenei o luitau o lo o feagai ma le Matagaluega i le tualga lea, o le leai o se malosiaga faale-Tulafono e faatagaina ai le Matagaluega e faasala pisinisi. Ia masalo la o se vaega e toe tilotilo i ai le Matagaluega, aemaise foi o le Malo, pe a faapea e toe faatulaga le vaega lea.

O le tulaga i laisene pisinisi, e manatu o lea e silafia uma e le paia foi i le Fono mamalu, ona o le tulaga foi lea e le mafai ona faitoatasi e le Matagaluega e pei ona i ai le Lipoti ua fofola se faaiuga, ona e i ai isi Matagaluega e latou te galulue faatasi ona tuuina mai lea o le tulaga foi e pei ona aumai le tulaga lea o laisene pisinisi. Ae faamauina foi le fautuaga i le tulaga foi e pei ona i ai le tuuina atu o nei vaega ma galuega e faatino e se itutino e tasi. Faafetai tele mo le tulaga o fesoasoani mai ma fautuaga.

O le tulaga o galuega faavaitaimi pei ona toatele, e toaiva sui usufono mamalu o le Palemene e pei ona aumai foi le agaga faafetai i le tulaga o lo o ua taoto i ai le finagalo foi o le Afioga i le Sui Minisita, a o tatou talia foi le faataotolia i apulusia o tofaga o le Afioga i le Minisita e pei ona faataoto i ai le tulaga o a tatou galuega faavaitaimi i le tuuina atu lea i tua i Fono Faufautua a itumalo.

Ia, e momoli foi le agaga faafetai i le fautuaga foi a le Igoamatua i Faleata 4 i le tulaga lava ia o pisinisi. Masalo sau se taimi ona saunoa lea o Afioga i Minisita, aua e pei o le tulaga e tele ina aumai ai, o le tulaga o lo o i ai current issues o mea nei o pisinisi.

I le tulaga i le vaega lona tolu e pei ona faafesili Sagaga, ia masalo o le a tali i ai le Sui Minisita i aulape i tulaga pe a oo ina tutupu ni aulape. Ia o vaega ia o lo o manino i ai le Afioga i le Sui Minisita, masalo o le a tuuina atu ai le tali o le vaega lea, aua o lo o faatalanoaina i luma o le Laulau a Fono a le Kapeneta.

I le sui usufono mo Alataua Sisifo, ona o le Lipoti lea sa talanoaina sa faafesili i le aofaiga o ni tina, o le Lipoti lea e talanoaina o lo o i totonu o le vaega o le consultation phase o le poloketi. O lona uiga o le faafesili e maua mai le isi Lipoti lea e i luma mai le aofaiga, ae masalo foi o le a fesoasoani mai le Afioga i le Minisita. Ae maitauina i le taimi lenei i le faafesili foi i le taimi lenei, e 30 tina o la ua i ai i le taimi lenei, ae faatoa maua mai la le Lipoti lenei i isi a tatou Lipoti Faaletausaga o mulimuli mai.

Ia, o Vaimauga 2, e momoli le agaga faafetai. Malo foi mo fautuaga e faufau ai ma tapena ai pulu o le tatou vaafolau, aua le manuia o le tatou atunuu e tauala atu foi i tatou galuega faavaitaimi. Ia masalo o la ua faamau e le Afioga i le Sui Minisita le fautuaga ma le talosaga foi na aumai, ia e tali atu ai i se taimi o mulimuli mai.

Ia, o Samatau ma Falelatai, ia o le tulaga lava i galuega faavaitaimi. Na aumai foi fautuaga e faaleleia atili ai lea vaega o le tatou galuega.

I le sui usufono mo Lefaga ma Faleaseela, e manaia foi fautuaga i le tuufaatasiga o Matagaluega. Ia o lea e faafogamaua mai le Afioga i le Ofisa Sili o Pulega aemaise foi o le Minisita o fitoitonu ai lea vaega o le tatou galuega, ia o le a aumai ai se tofa mulimuli pe a maea ona faatalanoa lea vaega.

O le tulaga pei ona faafesili le Afioga foi ia Aana 2 i le tulaga o galuega ia e ese mai galuega faavaitaimi ma le tulaga o tausima matua, ia masalo o lea o le a talifuaitau le Afioga i le Sui Minisita, ia o lo o i ai le faatalanoaga o vaega nei, o lo o manino le tulaga o lo o taoto ai le galuega lea.

Ia ma si ou uso mai le motu tele i Safotulafai i Faasaleleaga 5, ia ona o lea e talanoa i le taimi lenei i mea nei o foreign investors. Ia leaga o lea e te le i agai mai lau fesili i le Taitai o le Komiti, ae pei o lea na agai lau fesili i le Sui Palemia. O lona uiga, e tatau lava ona tali atu le Afioga i le Sui Palemia i se taimi mulimuli ane e faamalieina ai lou finagalo lau Afioga i le sui usufono mamalu.

Lau Afioga i le Fofoga Fetalai, ia o sa matou tulai atu lea, ae manatu e faaoga foi lenei avanoa lau Afioga i le Fofoga Fetalai, e momoli ai foi le agaga faafetai i le Komiti aemaise foi o le Ofisa Sili o Pulega, le paia foi o le Matagaluega i ona tulaga faalupe, Ofisa Sili Lagolago ma le paia i le Matagaluega aua foi le galuega sa outou galulue ai. O le tala a le Tusi, e le o auaoa le lagi i la outou galuega ma lo outou afu liligi. Ia tatou tau fai tatalo foi a o i ai foi le siigagasegase a le Afioga i le Minisita, o se taimi, o se itula, o se aso, o se sekone tatou feiloai, ona faafoi lea o le viiga i le Atua.

O sa matou tali atu lea lau Afioga i le Fofoga Fetalai. Ia manuia tele le Fonousu a Samoa. Faafetai.

**FOFOGA FETALAI:** Ou te tapa lau Afioga i le Sui Minisita o Pisinisi, Alamanuia ma Leipa mo nisi foi o mataupu sa laga e le Maota.

**Afioga Hon TOEOLESULUSULU CEDRIC POSE SALESA SCHUSTER:** Faafetai lau Afioga i le Fofoga Fetalai mo le avanoa. Faafetai atu foi i sui usufono mamalu o le Palemene sa faaali finagalo aemaise o fautuaga sa tuuina mai. Ou te talitonu o le tele o fautuaga ua faailoa mai o lea ua faamauina e le Matagaluega ma o le a galulue i ai e faatinoina ma faaleleia foi nisi o auaunaga ua faapea ona manaomia le faaleleia.

Ae lau Afioga i le Fofoga Fetalai na ona ootoo atu o nisi o vaega na patino i ai faafesili foi a sui usufono o le Maota. O le vaega 1 o le tulaga lea i grant lea mo tina, lea pei sa saunoa i ai le sui usufono mo Alataua Sisifo. Ia e pei ona faailo e le Taitaifono, o le taimi nei o le grant e mo capacity building, o le faaleleia lea o le atinaeina o pisinisi a tamaitai, ma e pei ona i ai i le Lipoti, o le taimi lea o le tapenaga o taiala. O le taimi nei ua maea le aoaoga muamua e faasino tonu lea i le digital marketing, ma e 30 tamaitai faipisinisi sa auai i lea course, ma ua faaauau pea nisi foi o vaega e faagasolosolo nisi o aoaoga aua lava le tapueina ma le faaleleia foi o taumafaiga o le faaleleia o pisinisi a tina ma tamaitai.

I le vaega sa faapea ona faailo foi i le tulaga lea o le leai o se malosiaga o le Matagaluega e taofia ai. Ua faailoa mai, o le faanaunautaiga o le Matagaluega, e muamua, afai o i ai ni tulaga ua faaletonu ai se auaunaga a se faleoloa po o se atinae, ona ave muamua lea i ai o le warning ma ave i ai le Lipoti o vaega e ao ona faalelei, ona toe asia lea i se taimi mulimuli ane. Afai e asia atu ua mafai ona faaleleia ma faamalieina fautuaga ona faataatia lea. Ae afai e le o mafai ona faamalieina ma e le o usitaia nisi o fautuaga, o i la faatoa faaoga ai loa le power o le Tulafono e tauala atu lea i le Matagaluega. Ae pei lava o le naunautaiga o le Matagaluega ina ia mafai ona fesoasoani foi ma faailo i nisi, i a tatou pisinisi ia auala e ao ona toe faaleleia ai.

Ona see mai lea lau Afioga i le Fofoga Fetalai i le tulaga lea o laisene. E talitonu o le tele lava o nei vaega o lo o faapea ona faagaoioi foi ma o lo o maoti lava galuega e faatino e le Matagaluega o Leipa, Alamanuia ma Pisinisi, maoti foi galuega o lo o faapea ona faatino i lalo o le vaega o tiute. Ma e ao lava, e pei lava ona maua foi i saunoaga, e taua lava le galulue faatasi. O le naunautaiga lava ina ia faafaigofie mo tatou tagata faipisinisi. Ma o lo o faapea ona faaauauina pea le galulue faatasi ina ia maua lava se aualae fesoasoani ai i le paia ma le mamalu o le tatou atunuu.

Lau Afioga i le Fofoga Fetalai, ona ou oo mai lea i le vaega lea, ona e feoloolo nisi o sui usufono sa faapea ona faaali finagalo i le tatou tapenaga foi lea o le tatou RSE po o galuega faavaitaimi i atunuu i fafo. E pei ona faailo i le Tali a le Malo lau Afioga i le Fofoga Fetalai, o lo o faapenei ona feagai nei le soa-komiti a le Kapeneta o lo o faapea ona iloilo ina ma tapenaina foi ma le Matagaluega lenei faiga taiala fou ina ia mafai ona mulimulitaia le alualu i luma.

E pei ona faailo foi i fonotaga ua tuanai lau Afioga i le Fofoga Fetalai, ua tele aafiaga foi sa faapea ona faailo e le mamalu o le atunuu. E le gata foi i lea na faailo foi i totonu o le Maota nei nisi o toatuga aemaise foi o vaega e ao ona matimati ma toe faaleleia. O lea la ua faamaea lea vaega, ma e faailoa atu, o le tapenaina o lenei taiala sa faapea ona faaaogaina ai ma maua mai foi le leo ma fautuaga mai nisi foi o le tatou atunuu o lo o i atunuu mamao, o i latou o lo o faapea foi ona o latou silafia nisi o toatuga sa feagai ai. O lo o faaaogaina foi nisi o suesuega na faatinoina e le Malo o Niu Sila ma le Malo o Ausetalia. Ua i ai fautuaga i auala e ao ona faaleleia ai. Sa faatinoina foi le feiloaiga ma le faatalatalanoaga, ma faaoo mai foi finagalo o Iuni, o i latou o lo o faapea ona vaavaaia nisi o tagata faigaluega.

E le gata i lea o le faatalanoaina foi o le tatou Matagaluega o le Va i Fafo, ona o tulaga uma nei, o lea la ua faataoto ai. E le i maea lelei ma se i maea lelei ona maua foi i ai se finagalo o le Kapeneta ona faailo lea. Ae na ona ou faapea atu, o vaega ia ua faaalia e le gata o le faamatuu atu i tua i itumalo, ae ao foi ona i ai tapenaga ina ia nofo sauni ma i ai le tomai i itumalo e mafai ona resitala ma review ma assess ai tagata faigaluega. E le gata foi i lea, ia o le i ai foi o se vaega e mafai ai ona puipuia, tasi lea o vaega taua i le iloilo o lo o i ai nei, ina ia mafai ona puipuia a tatou tagata faigaluega mai le tulaga o le oo atu i fafo, e ese le totogi e tau i inei ese le totogi i fafo. O isi vaega uma e ao ona puipuia ai ma faatalanoa foi ma kamupani o lo o omai ia aua ne i latou take advantage ina o tatou tagata faigaluega.

O vaega uma nei o lo o tapena i ai le tatou Taiala ma le faamoemoe ina ia mafai ona faamaeaina i le masina nei, ia mafai ai ona roll out e pei ona i ai ma faailoa atu ia Aperila, a ia maua se taimi e amata ona tapena ai tatou itumalo, faatino foi aoaoga e le tatou Matagaluega, ina ia mafai ona faatino e pei ona i ai le faamoemoe o le tatou Malo mo lenei atinae.

Lau Afioga i le Fofoga Fetalai, o se fesoasoani atu lea i nisi o mataupu sa faapea ona laga e sui usufono. E faafetai atu ai foi i le Matagaluega i le latou tapenaga i mataupu uma e le gata o lenei Lipoti, a o le faatinoina foi o galuega ma fesoasoani mai aua se atinae mo le tatou atunuu.

Faafetai atu foi i le Taitai o le Komiti ma le Komiti mamalu, aemaise le paia ma le lasilasi o le tatou fonotaga i lenei aso. Soifua ma ia manuia.

**Afiog Sulamanaia Fetaiai Tauiliili Tuivasa:** Lau Afioga i le Fofoga Fetalai...

**FOFOGA FETALAI:** Se i tulai mai le sui usufono mo Vaimauga 1.

**Afioga Sulamanaia Fetaiai Tauiliili Tuivasa:** Masalo e momoli le agaga faafetai a lenei itumalo i le saunoaga matagofie a le Taitaifono aemaise foi o le Minisita, ona sa taua foi e lenei itumalo le tulaga lea i le Lipoti, lea foi sa saunoa ai le Taitaifono i mea o luitau. O lea la ua saunoa manino le Afioga i le Minisita, ona o le tulaga lea na aumai e le Komiti fai mai e leai se malosiaga faaletulafono o faatagaina ai ni Matagaluega i le taofia o pisinisi.

O lea la e momoli ai le agaga faafetai i le Afioga i le Minisita, o lea ua tau manino o lea e i ai Tulafono po o lo o i ai le malosiaga o ni Matagaluega e taofi ai. E pei o le agaga lena sa popoe i ai lenei sui usufono leaga o lea e faalogologo le Matagaluega, o lona uiga o lea e fai lava le o e fai asiasiga ma faapena le faatinoina o pisinisi, le taofiga, ae le o i ai se malosiaga faaletulafono.

O le agaga la o le faafetai a lenei sui usufono, o lea ua manino le Maota lenei ma le saunoaga matagofie a lau Afioga i le Minisita, o lea ua leva lava ona i ai Tulafono i totonu o le Matagaluega e mafai ona taofia ai pe a maua atu e le au asiasi a le Matagaluega o Leipa ni pisinisi ma ni tulaga i ni kamupani o lo o faatinoina le auunaga e aunoa ma le usitaia o Tulafono a le Matagaluega. Ma lou agaga faafetai lau Afioga i le Fofoga Fetalai.

**FOFOGA FETALAI:** Malo faafetai. Ia tulai mai lau Afioga i le Taitaifono mo le lafo.

O lea ou te tau maua atu lau Afioga i le Sui Palemia pei o le fesili a Faasaleleaga 5 lea e te fia saunoa i ai?

**Afioga Hon Tuala Tevaga Iosefo Ponifasio:** Ia o lea lava lau Afioga. E mafai ona toe kava atu i se taimi pe a toe maua sou avanoa, ae o le a lafo atu e faaauau le galuega a le Fono.

**FOFOGA FETALAI:** Ia, aua o lea e i ai lou taimi mulimuli ae... aua ua uma foi ona e tali muamua i ai, ae manaia foi se update mai ona manaia lea. Se i tulai mai lau Afioga i le Taitaifono mo le lafo.

**Afioga NIUAVA ETI L. MALOLO:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le P.P.2022/2023 Nu.114, Lipoti a le Komiti o le Vaega Tau le Tamaoaiga i le P.P.2021/2022 Nu.50, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe 2020/2021.*

Ma lou faaaloalo.

*Faaluaina e le sui usufono mo Falealili 2 ma le sui usufono mo Faasaleleaga 2.*

*Na faamaonia le lafo.*

**FOFOGA FETALAI:** Ou te tapa lau Afioga i le Sui Minisita i le lafo i Tali a le Malo.

**Afioga Hon TOEOLESULUSULU CEDRIC POSE SALESA SCHUSTER:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa Tali a le Malo i Fautuaga a le Komiti o le Vaega Tau le Tamaoaiga e pei ona ou tolaulauina.*

*Faaluaina e le Minisita mo le Soifua Maloloina ma le Minisita mo Fesootaiga ma Faamatalaga Vavave Faaonaponei.*

*Na faamaonia le Tali a le Malo.*

**P.P.2022/2023 NU.94, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2021/2022 NU.23, LIPOTI FAALETAUSAGA A LE OFISA O LE LOIA SILI MO LE TAUSAGA FAALETUPE 2019/2020**

**P.P.2022/2023 NU.173, TALI A LE MALO I LE P.P.2022/2023 NU.94, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2021/2022 NU.23, LIPOTI FAALETAUSAGA A LE OFISA O LE LOIA SILI MO LE TAUSAGA FAALETUPE 2019/2020 – ILOILOGA**

**FOFOGA FETALAI:** Tulai mai lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae.

**Afioga AUUPAAU MULIPOLA ALOITAFUA MULIPOLA (Taitaifono Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae):** Lau Afioga i le Fofoga Fetalai ou te

faatu le lafo, *Ina ia faautagia e le Fono Aoao le Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae o lo o ua tuuina atu ai ana Sailiiliga, Fautuaga ma Iugafono.*

*Faaluaina e le sui usufono mo Vaisigano 1, sui usufono mo Gagaiformauga 2 ma le sui usufono mo Faleata 1.*

*Na faamaonia le lafo.*

**FOFOGA FETALAI:** Ou te tapa lau Afioga i le Taitaifono mo le tolaulauina o Sailiiliga, Fautuaga ma Iugafono a le Komiti.

**Afioga AUUPAAU MULIPOLA ALOITAFUA MULIPOLA:** E manatu o lea ua pupuni vaiali ae tatala vaiola. Ae ua talalupe foi lele foi le malae o Satuala i Salafai ae talaleomalie le alo o le Tuiatua. E talitonu foi ua tatou utuvai magalo i seeti i lenei taeao i le pule aoao a le Atua foafoa ma Lona mamalu e mali'olagi i tafatafailagi ina ua feiloai lenei Palemene i mauga o ao, ae ua le o liulaumea.

E fia fonofaapipii i le faafetai a lau Afioga i le Fofoga Fetalai i le taulaga siitia i le Tapaau Sili i le lagi na se i e tuitui ai faitotoa o le lagi ae tatala mai Lona agaga paia e toia ai tatou i lona valaauina.

Faafetai atu i Ofisa Sili o Pulega o Matagaluega faapea foi lau Afioga i le Tamaitai Loia Sili. Faafetai atu foi i lau susuga i le faafeagaiga ma lou faletua o lo o tatou mafuta pea aua galuega fai a lenei Palemene.

Ae tulai ma le ava tele lau Afioga i le Fofoga Fetalai, faafetai tele mo le avanoa e tuuina atu ai e fai ai au ma sui o le matou Komiti e folasia taunuuga o a matou Sailiiliga, o ni Fautuaga aemaise o a matou Iugafono.

Lau Afioga i le oototoga o Saililiga a lenei Komiti sa iloiloaina ai le Lipoti lenei a le Ofisa o le Loia Sili mo le tausaga faaletupe 2019/2020.

Na faamauina e le Komiti sa tuai ona tuuina mai lenei Lipoti i le Fono Aoao. Sa toe faamanatu i le Ofisa le taua o le mulimulitaia o le taimi faatulagaina e tuuina mai ai lenei Lipoti.

A o faagasolo ai iloiloga a le Komiti, sa faailoa mai e le Ofisa o lo o tapena foi le latou Lipoti mo le tausaga 2020/2021 e tuuina mai i le Palemene lenei.

O lo o atagia i lenei Lipoti vaega sa mafai ona ausia e le Ofisa, faatasi ai ma fuafuaga na le mafai ona ausia, aemaise o luitau ma faafitauli sa tulai mai.

Lau Afioga i le Fofoga Fetalai, e 6 vaega o le Ofisa e aofia ai:

1. Vaega o le Tusi Tulafono.
2. Vaega o tagi e faasaga i le va o tagata ma mataupu faale-Tulafono.
3. Vaega o Pisinisi ma Tulafono Faava o Malo.



4. Vaega o moliaga solitulafono e pei ona i ai le faamasinoga faaitumalo, vaega o moliaga o solitulafono, faamasinoga maualuga ma le vaega o le auaunaga lautele.

Lau Afioga e ui o le tele o luitau o le siama o le Misela ma le faamai o le Koviti-19 sa feagai ma le atunuu, ae pei ona aafia ai galuega a le Malo, ae na maitauina lava sa mafai ona faataunuu ma le faaauau auaunaga a le Ofisa e tauala atu i ana vaega e 6 ua taua.

Lau Afioga o le a ou taumafai e tuuina atu se vaaiga aoatotele i galuega sa mafai ona faatino e le Ofisa o le Loia Sili.

### **1. O le vaega e tusia Tulafono.**

Na matauina e le Komiti na mafai ona faamaeaina le tusiaina o Tulafono ma Tulafono Faatonutonu a le Vaega lenei, i le taimi sa fuafuaina. E 65 le aofai o Tulafono faaopoopo sa mafai ona faamaea i totonu o le taimi faatulagaina. Ma ua sili i le 51 sa i ai i le Tausaga Faaletupe 2018 agai i le 2019. Ua maea foi ona tuufaatasia le tuufaatasiga o Tulafono Faaletausaga 2019, ma ua maea ona faasoia atu i le Faamasinoga, le Pule Faatonu, Fono Aoao ma le Sosaiete o Loia.

E ui i lea lava lau afioga i le Fofoga Fetalai, sa iai nisi o galuega faatino sa le mafai ona ausia, e aofia ai le lei mafai ona aoina mai o Tupe Maua e le o ni lafoga. O le mafuaaga lau Afioga ona o le tuai ona maua e le Ofisa o le totogi o ana auaunaga faatasi ma Tusi Tulafono o lo o faaogaina.

I le faaiuina ai o le Tausaga Faaletupe o lo o iloiloaina, sa faaitiitia ai tupe na mafai ona aoina mai e le Ofisa e pei ona faamauina ai le \$12,382 pe a faatusatusa i le \$50,146 sa maua i le Tausaga Faaletupe, 2018/2019.

### **2. Vaega o Tagi Faasaga i le va o Tagata ma manatu Faaletulafono.**

Lau afioga i le Fofoga Fetalai o le vaega lenei e gafa ma le tuuina atu o fautuaga Faaletulafono i luga o Tulafono o lo o faafoeina e Matagaluega ma Faalapotopotoga a le Malo. Na matauina e le Komiti e 149 talosaga mo fautuaga Faaletulafono sa taulimaina ma faatinoina loa e le vaega lenei.

O se siitaga e tusa ma le 23% pe a faatusatusa i le Tausaga Faaletupe 2018 agai i le 2019 lea sa faamauina ai le 121 o talosaga. E 14 le aofai o tagi fou tau i le va o tagata ma iloiloiga Faa-Faamasinoga e

faasaga i le Malo ma le Faamasinoga o Fanua ma Suafa ma o le aofai o ia mataupu o taua atu i lalo.

- ❖ E 3 mataupu ua maea ona faatinoina.
- ❖ 7 mataupu ua manuia lona faatinoina.
- ❖ 2 mataupu toeitiiti lava maea.
- ❖ Ma le 2 mataupu e le i manuia lona faatinoina.

Lau afioga i le Fofoga Fetalai e \$62,441 Tupe Maua sa mafai ona aoina mai e le vaega lenei.

**3. O le vaega lea o Tulafono Tau Fefaatauaiga ma Tulafono Faava-o-Malo.**

O le vaega lenei sa aloaia lona tuueseina mai i le vaega o tagi faasaga i le va o tagata ma manatu faaletulafono ia Mati o le tausaga e 2017. Na matauina e le Komiti e 98% o konekarate ma maliega sa mafai ona faamaeaina. Sa iai foi ni poloketi taua sa mafai ona faatinoina e aofia ai Tusi Taiala a le Ofisa o Tupe ma vaega e 6 mo faatauga ma konekarate Vaega K 2020. Tusi Taiala mo fefaatauaiga a le Malo Tausaga e 2020 ma pepa o Tauofoga.

**4. O le Vaega lea e faatautaia Faamasinoga Faasolitulafono Faamasinoga Faaitumalo.**

Lau afioga i le Fofoga Fetalai e 2,134 le aofaiga o mataupu sa faasee mai ma faatautaia ai Faamasinoga Faasolitulafono. O le aofaiga lenei e atagia ai le maualuga o le numera o soligatulafono pe a faatusatusa i le 2 tausaga ua tuanai o lo o siitia ai pea i luga. Sa taumafai le vaega lenei e faamaea mataupu nei i totonu o le piriota o lo o iloiloaina nei, peitai e na o le 990 mataupu sa mafai ona faatino ma faamaeaina.

Lau afioga sa faatino polokalame faale-aoaoga mo le vaega lenei o Loia Faapitoa mo le faatautaia o Faamasinoga Solitulafono i itu e aofia ai mataupu Matagaluega a le Malo, ma isi ituaiga faasologa o faamasinoga e talafeagai ma mataupu tau solitulafono e pei ona taua i lalo. O tupe maua mai i soligatulafono, aumaia o tagata mai fafo ma e manaomia ai loia e faatino le va o ni atunuu se 2. O le vaega 4 o le vaega lea e faia moliaga o soligatulafono i le Faamasinoga Maualuga.

Lau afioga i le Fofoga Fetalai e 653 le aofai o mataupu tau soligatulafono na mafai ona lesitalaina i totonu o le Tausaga Faaletupe o lo o iloiloaina. I le faaiuga o le piriota o lo o talanoaina ai e 327 mataupu ua tapunia, 157 o lo o talia le faamaeaina. O le ootootoga o ituaiga o tulafono sa faamauina e aofia ai soligatulafono

ua aafia ai le tagata, 71 mataupu na tapunia. O soligatulafono ua aafia ai meatotino, 139 mataupu ua tapunia. Fualaa faasaina ma mariuana, 93 mataupu ua tapunia. Soligatulafono tau faigaaiga, 24 mataupu ua tapunia.

**5. O le vaega o auaunaga lautele a le Ofisa.**

O le vaega mulimuli leni o le Ofisa lau afiga i le Fofoga Fetalai o lo o gafa ma le tuuina atu o le auauna sili ona lelei e lagolago ai le isi vaega ma ia mautinoa e ausia manulauti faaletulafono a le Ofisa ua maea faataoto e tauala atu i le auaunaga leni. E pei o le puleaina o auaunaga, faamaumauga fesootaiga faatekonolosi, o alafua ma auala e fuafuaina ai ma le puleaina o tagata faigaluega i vaega tau seleni.

E 85 avanoa faigaluega sa faamaonia i le Tausaga Faaletupe o lo o iloiloaina mo le Ofisa. Peitai i le aso na tapenaina ai leni Lipoti e 77 avanoa na faatumuina. E aofia ai avanoa faakonekarate, faigaluega tumau ma tagata faigaluega faavaitaimi. O le 69% o le aufaigaluega o tamaitai, e 31% o alii. E 8% o i latou sa tuua le Ofisa mo nisi avanoa faigaluega ma fuafuaga faaleaiga.

Faamatalaga tau tupe a le Ofisa, o Tupe Faatatauina mo le Tausaga Faaletupe 2019/2020 e \$5,305,858. O Tupe Faatatauina o le Tausaga Faaletupe i tua atu 2018/2019 e \$4,968,995. O le aofai o Tupe Faaalu i le 2019/2020 \$4,727,090. I le tausaga i ona tua atu 2018/2019, \$4,574,778.

Lau afiga i le Fofoga Fetalai, sa faamauina e le Komiti luitau sa feagai ma le Ofisa nei o le Loia Sili. Ma o luitau lava sa aliae mai foi i isi tausaga faaletupe e aofia ai:

- i. Feagai pea o le vaega tusi tulafono ma le faafaigaluega o loa amata ona o le maualalo o le numera o latou e faau mai i mataupu tau Tulafono. O nisi o taimi e faasoa ai galuega i isi vaega mo le faatinoina ma aveai ai ma faafitauli i lena vaega ia latou foi galuega.
- ii. O lo o taumafai e taofiofi tagata faigaluega ina ia iai pea latou ua tele tausaga o galulue i le Ofisa. O le piriota o lo o iloiloaina sa toatele le aufaigaluega faamavae ona o todogi o lo o maua mai i isi galuega. Ua tuuitiitia ai le vaega tuai ae ua tele se vaega fou faatoa tau amata i le galuega.
- iii. Tulai mai o le faaletonu o le galulue o le Ofisa ma le Matagaluega o Leoleo, o le ala lea o le i ai o manaoga ina ia

toe faaleleia le sootaga ma le galulue faatasi o leoleo ma le Ofisa ona o se tulaga e matua taua tele.

Ona ou oo mai lea lau afioga i itu na matauina e le Komiti lenei. O le vaega lenei mo le silafia e le Maota, o lo o faavae atu ai ana fautuaga:-

- i. Lau afioga i le Fofoga Fetalai, i le matau a le Komiti, o le tausaga faaletupe o lo o iloiloaina, o se vaitaimi aupito malosi lea o le Ofisa ona o le maualuga o le aofai o loia sa faaopoopoina e pei ona iai avanoa e 38 pe a faatusa lea pe tusa lea ma le 91%. E ui i lea, o le latalata i le faaiuga o le Tausaga Faaletupe lenei o le 2019/2020, sa faamavae ai loia e 19, ma o le toatele o alii e 5 avanoa fou faaopoopo ma e oo mai i le aso o lo o iloiloaina ai le Lipoti lenei, e toa 22 loia o lo o faatinoina le galuega.

O le tasi lenei mataupu sa feagai ma le Ofisa i le tele o tausaga ua mavae ma e eseese mafuaaga e pei o totogi, malaga atu i atunuu i fafo faatasi ai ma le tele o Ofisa ma Matagaluega o lo o faatuina ai ia latou vaega o loia, ma ua tosina i ai loia a le Ofisa.

- ii. Lau afioga i le tulaga lava o le utiuti o loia, sa faamauina e le Komiti sa iai ni avanoa faasikolasipi sa mafai ona agavaa i ai le silia i le 4 loia i le tausaga. Peitai o nai suiga sa faatinoina e le Malo, ua na o le 1 ai le avanoa i le tausaga. Sa faamauina se talosaga a le Ofisa ina ia toe tatala lea avanoa e agavaa ai loia e Malaga atu e toe faalautele lo latou tomai i le galuega ma foia ai le faafitauli o lo o ua tulai mai.

O le vaega mulimuli lau afioga, i le faaiuga o iloiloga a le Komiti na maua ai, e iai faafitauli o lo o aafia i le Lipoti a le Ofisa e foliga tutusa ai ma isi Lipoti sa iloiloaina e le Komiti. E le o manino faailoilo o fua faatatau o taunuuga ma fuafuuga o galuega faatino aemaise pasene sa fuafuaina. O pasene ua ausia ai ma le le lava o faamatalaga e faamanino ai ia vaega. O se faaletonu lenei sa matauina e le Komiti ao faagasolo ana iloiloga ma e i ai le manatu ua aafia Matagaluega uma ma Ofisa o le Malo.

Ia ona ou oo mai lea lau afioga i le Fofoga Fetalai i fautuaga a le Komiti. I le faia i luga o ana sailiiliga e fautuaina ai e le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae le Malo ina ia:

### **Fautuaga 1:**

Silasila le Malo i le toe tatalaina o avanoa sikolasipi sa mafai ona agavaa i ai loia, e Malaga atu ai i aoaoga tau tomai faaloia. E pei ona matauina i ana iloiloga i tausaga 2013, sa iai suiga a le Komisi o le Galuega a le Malo, lea sa iai ai e na o le toatasi le loia e mafai ona agavaa i avanoa faasikolasipi i

le tausaga. E talitonu le Komiti e taua tele lenei avanoa ina ia siitia ai le tomai o loia amata ma foia ai le faafitauli, o le utiuti o loia e faatinoina le galuega i totonu o le Ofisa.

**Fautuaga 2:**

Silasila le Malo i se faatulagaga po o se auivi e faaaogaina e faatino ai Lipoti Faaletausaga o le Ofisa, aemaise o faamatalaga o galuega faatino sa ausia ma fua faatatau o taunuuga o galuega faatino ina ia mautinoa le manino, sao ma atoatoa a o le i tuuina mai i le Palemene. E manatu le Komiti e tatau ona taga tasi Lipoti Faaletausaga Matagaluega ma Ofisa uma o le Malo, ina ia le gata o auivi e faaaogaina, faapea foi faamatalaga o galuega faatino sa ausia ma le ausia, ina ia alofia le tuuina mai na o le ausia, lanu faailoilo po o le 100% e aunoa ma faamatalaga e atagia ai le moni o ia vaega.

Ia ma le vaega mulimuli o le Lipoti a le Komiti lau afioga, o lana faaiugafono e faapea, e fautuaina le Komiti o Tulafono Tumau, Mataupu Tau Faigapalota, Talosaga ma Tofiga Faale-Faavae, le Fono Aoao ina ia faamaonia le P.P.2021/2022 Nu.23, Lipoti Faaletausaga a le Ofisa o le Loia Sili mo le Tausaga Faaletupe 2019/2020.

Ona faamaea atu lea o se matou tala, alofagia e le Atua lau afioga i le Fofoga Fetalai, Tamaitai Palemia o lo o toesea i Fonotaga ma le Kapeneta, ma le mamalu o lenei Palemene. Tuuina atu ma le faaaloalo tele, manuia le Fono.

**FOFOGA FETALAI:** Malo faafetai i lau afioga i le Taitaifono, tulai mai lau afioga i le Sui Palemia mo le tolaulauina o Tali a le Malo.

**Hon TUALA TEVAGA IOSEFO PONIFASIO:** Lau afioga i le Fofoga Fetalai, ou te tolaulauina Tali a le Malo e faatatau i fautuaga a le Komiti o Tulafono Tumau, Mataupu tau Faigapalota, Talosaga ma Tofiga Faale-Faavae, e pei ona folasia manino nei e le Taitaifono. nei e le Taitaifono.

O le tali a le Malo i le P.P.2022/2023 Nu.94, Lipoti a le Komiti o Tulafono Tumau Mataupu Tau Faigapalota, Talosaga ma Tofiga Faale-Faavae i le P.P.2021/2022 Nu.23, Lipoti Faaletausaga a le Ofisa o le Loia Sili 2019/2020.

Lau afioga i le Fofoga Fetalai e tusa ai ma le Fautuaga Muamua, ina ia toe silasila le Malo i le toe tatalaina o avanoa faasikolasipi e mafai ai ona agavaa le auloia e agai atu mo aoaoga tau tomai faaloia. O le tali a le Ofisa o le Loia Sili, e talisapaia ma lagolagoina ma ave le faafetai a le Ofisa o le Loia Sili i le fautuaga a le Komiti mo le iloiloia i le Kapeneta ma le Komiti o Sikolasipi, ona e leai se malosiaga o i ai i le Ofisa, e mafai ai ona faia ia iloiloiga faasikolasipi mo i latou e fia ave ma loia.

E oo mai i le taimi nei e le i maua mai lava se tali mai i le Komiti o le Sikolasipi, e uiga i le talosaga a le Ofisa lea na tuuina atu i le Kapeneta sa talosagaina ai le faaaogaina ai o tupe faasao e faaaogaina e faatupe ai aoaoga a tamaiti aoga faaloia o lo o galulue faavaitaimi i totonu o le Ofisa. Na tuuina atu le pepa i le Komiti o Sikolasipi mo le iloiloga talu mai Tesema 2021, sa tuliloa pea e le Ofisa se tali ma se faaiuga. E oo mai i le taimi nei, ae ua tuuina mai le fautuaga e le i taloina se fonotaga a le Komiti o Sikolasipi.

O le fautuaga lona 2, tulaga o le silasila o le Malo i le faatulagana o se auivi e faatinoina ai Lipoti Faaletausaga a le Ofisa ia aemaise o faamatalaga o galuga faatino sa ausia i fua faatatau o taunuuga fuafuaina o galuega faatino po o Key Performance Indicators ina ia mautinoa o lo o manino sao atoatoa, ma le tuuina mai i le Palemene.

O le Tali a le Ofisa o le Loia Sili, ua faamauina ma le faafetai le fautuaga a le Komiti, o lo o faaauau pea ona faaleleia e le Ofisa le faatulagaina ma le tuuina atu o faamatalaga i lana Lipoti Faaletausaga. O le natura foi lea o le Ofisa o le Loia Sili, e tele lona eseesega mai i Matagaluega ma Faalapotopotoga uma o le Malo ona e le faatinoina e le Ofisa ni Poloketi.

O le galuega autu lava o le tuuina atu o fautuaga faaletulafono ma fai ma sui o le Malo i mataupu tau Tulafono, fautuaga ma manatu faaletulafono, tusiaina o Tulafono, faatinoina o moliaga faasolitulafono, ma iloilo maliega faaletulafono o konekarate ma Ofisa uma a le Malo, ina ia tausisia le manuia uma o ona tagata. O le a Iloilo ia tapulaa a le Ofisa, e tusa ai ma galuega faaloia e faatinoina.

Male agaga faafetai i lau afioga.

**FOFOGA FETALAI:** Malo saunoa i lau afioga i le Sui Palemia e tusa ai ma le tolaulauina o Tali manino a le Malo e tusa o Sailiiliga ma Fautuaga a le Komiti. Malo lava mo le saunoaga malamalama. Ou te talitonu foi, ua tele ina malamalama uma ia le tatou Maota. Ioe, seivagana lava se mea e le o manino laitiiti, ia o le a tuu atu le avanoa.

Ia se i tulai mai ia le sui usufono o Vaimauga 1.

**Afioga SULAMANAIA FETAIAI TAUILILI TUIVASA:** E momoli le agaga faafetai i lau afioga i le Fofoga Fetalai. E tau foi o lenei sui usufono o le Lipoti mulimuli lenei o le Fonotaga. E momoli foi le agaga faafetai i le Taitaifono ma le Komiti, aemaise foi o le afioga i le Sui Palemia i tali.

Ia ae e le mafai ona tuua e lenei usugafono le taua o le mataupu foi po o lenei foi Matagaluega a le Malo. Le afioga i le Ofisa Sili po o le afioga i le Loia Sili ma le Matagaluega. E matau lava ma le totoa le agaga faanoanoa ona o le Lipoti o le toatele o Loia i lea foi piliota ua faamavae, 19 loia ua faamavae. Ia e pei e tau lagona ai le faanoanoa ia e leai se isi e pule toatasi lava ia le tagata ia.

Ae o le tulaga i le tuualalo a lenei itumalo, ia silasila ane le Faigamalo ina ia mafai ona faamalieina ia totogi o e o lo o agai atu i le Ofisa o le Loia Sili, ina ia ese lava ma isi loia a le tatou Malo ona o i lea e tua iai lenei Maota, ia aemaise foi le Malo i le fautuaina o le tatou Kapeneta aemaise le Palemene lenei. E pei o le lagona lena o lenei itumalo e tuuina atu.

Faafetai foi i le Tamaitai Loia Sili sa faafoeina lenei Matagaluega, e matau lava ma le totoa le agaga o lenei itumalo e le gata i le faafoeina o tulaga tau Tulafono, a lea foi e maua mai ai nai tupe maua, tupe mama. Ia o le agaga lava ia o le Malo o le tuuina atu o outou ina ia fai auaunaga.

O le tuualalo a lenei sui usufono ona o le matau atu i le tulaga i soligatulafono. Sa i ai lava se manatu o lenei usugafono e aumai se fautuaga a le Komiti. A silasila i le Lipoti o fualaau faasaina, 93 ia tulaga sa iai. E pei o le agaga lena o lenei itumalo sa tatau ona aumai se tuualalo ina ia mafai ona siitia i luga ni faasalaga o e maua mai i le soligatulafono lenei, fualaau faasaina. Ia o le Lipoti lea o le Lipoti 2019/2020, ia ae le mautinoa ma iloa i le taimi lenei, pe o fia se update i le tulaga ua iai.

Ae o le fia faafesili a lenei sui usufono le tele ma le matagofie o le Lipoti a le afioga i le Taitaifono. A silasila i le amataga o le tatou Lipoti, i luma, Aso o Fonotaga e 1. Molimau Tuufofoga e 6. O lona uiga e 6 e na faia ia lenei presentation ae o fea uma isi sui o le tulaga o le Komiti? O le faanoanoaga foi o lenei usufono a silasila foi i tua o le Lipoti, pe toa 4 ea e na e le o saini le Komiti. O le fesili la a le sui usufono o Vaimauga, o le a le mea ua le saini ai ia le Komiti? Ia aemaise lea e pei e vaai atu lea e pei e muamua lava i le Taitai o le Itu Agai lea e le o saini, ma isi sui na, Tea Peato, Fuiono. Po o le mea e tetee i le Lipoti a lenei Komiti.

E pei o le ala lena e fia maua ai se malamalamaaga a lenei itumalo aua e tatau ona saini uma ma lagolago le Lipoti ae a tou silasila i tua, e toa 4 latou na e le o saini.

Ae lau afioga i le Fofoga Fetalai e lagolagoina e lenei itumalo le tuualalo ina ia mafai ona toe ave alo ma fanau o lo o galulue i lenei Matagaluega. A outou silasila atu i le tulai mai a lenei foi Matagaluega le Tamaitai Loia Sili, e lagona ai lava le faanoanoa le le toatele o lenei Matagaluega e tua iai ia lo tatou Malo. Ae lagolagoina ia le toe tuu atu o alo ma fanau po o e foi o galulue i le Ofisa o le Loia Sili ina ia ave iai faamanuiaga e toe o ai i fafo e toe aoga.

Ia lau afioga i le Fofoga Fetalai, pau na o manatu o lenei itumalo e lagolagoina ai le Lipoti matagofie ma nai faafesili na. Ae avea lenei itula lau afioga e faamaise atu ai le agaga o le Atua i le valaau paia a le Atua i nisi foi tamalii o lenei afioaga o Fagalii, fetalai ia Naea Ulumanua Reupena. Ia mo le silafia e lau afioga i le Minisita o le LTA, ia o le tamalii lea o lo o leoleoina le tatou malaevaalele. O lea ua valaau i ai le Atua i le tamalii, ia faamaise le agaga o le Atua i lenei foi tamalii o Naea Ulumanua Reupena

ona o le valaau paia a le Atua, faamaise i le tina loto faanoanoa aemaise o le tatou afioaga.

Ia na o le pau lena o se manatu lau afioga i le Fofoga Fetalai, ia manuia tele toega o lenei aso.

**FOFOGA FETALAI:** Malo, faafetai, faafetai lava i le sui usufono mamalu mo le faaalua foi o lona finagalo. Ia malo foi faafetai. Ia se i tulai mai le sui usufono mo Vaisigano 1.

**Afioga NIUAVA ETI L. MALOLO:** Lau afioga i le Fofoga Fetalai e na o le 2 lava e fia oo iai se tala e pei ona maua foi i le Lipoti a le Komiti, momoli le agaga faafetai i le Taitaifono ma le Komiti, aemaise foi o le Matagaluega.

O le tulaga lea i lou lagona, o le vaega lea o le NPO. E i ai sou manatu e na ona tuu atu faafautuaga, pe a pe a toe faatu mai ia le vaega lea. O le uiga o le faamatalaga, aua o lea ua tuu nei i lalo o galuega foi ma le tauau o le AG, a o le AG, o lea e latou te fautuaina le Malo i le taimi lea. O lona uiga, e pei o lou ia lagona, o lo o iai se conflict of interest, tulou i vaega ia. Ae a tulai mai lava le vaega lea a le NPO e fai ia le latou galuega, e na o se tuualalo ma se fautuaga.

Ia aua e iai lou... i taimi foi a o ou faigaluega, e na o le tasi lava le tausaga na faatu ai le vaega maoti lea, ia ae toe repeal ia pe toe.. ia pei e faapena.. O lea le auga na faatu ai? Ia ae tasi ia le tausaga ae toe aveese. Ia ma lou faaaloalo lava lau afioga i le Fofoga o le Fono.

**FOFOGA FETALAI:** Ia se i tulai mai lau afioga i le Taitaifono.

**Susuga Hon Laauli Leuatea Polataivao Fosi:** Lau afioga i le Fofoga Fetalai...

**FOFOGA FETALAI:** Tulai mai lau afioga i le Minisita o Faatoaga ma Faigafaiva...

**Susuga Hon Laauli Leuatea Polataivao Fosi:** Lau afioga i le Fofoga Fetalai e talosaga atu lava i le sui usufono se i faaumi mai lava ia le NPO o la e tau fesili Sula po o le a le NPO faamolemole, faaumi mai le igoa ia malamalama lelei ia lau folasaga matagofie.

**Afioga NIUAVA ETI L. MALOLO:** Ia o le N for National, P for Prosecution, and O for Organization, ia Office.



**FOFOGA FETALAI:** National Prosecution Office, po o le vaega foi lea e avea ia mataupu tau soligatulafono i luma o le Faamasinoga. O le sao lea...

**Afioga SULAMANAIA FETAIAI TAUILILI TUIVASA:** Lau afioga i le Fofoga Fetalai leaga o lea ua taua ia lenei itumalo. Ae malamalama lenei itumalo i le taimi lena ua le toe iai se NPO i le taimi lenei. Ua toe ave uma lava mea i lalo o le AG. E pei o le agaga lena e toe faamanino atu ai o lea ua toe faatino mai lava sa... taimi sa iai i le Paeaiga ua tuanai, sa ese lava le NPO, ese le AG. Ae na iai nai toe suiga na, ua ave uma i lalo o le control a le afioga i le Loia Sili.

E pei o le agaga lena e toe fesoasoani atu ai leaga o lea ua fesiligia mai ia le tulaga o lenei itumalo ma lou faaaloalo lava.

**FOFOGA FETALAI:** Se i ou fesili atu lava la i le sui usufono mamalu o Vaimauga Nu.1, ua sui la le Tulafono?

**Afioga SULAMANAIA FETAIAI TAUILILI TUIVASA:** Lau afioga i le Fofoga Fetalai ua i lalo uma o le AG le tulaga lea. E pei o le agaga lena lea ua tuuina atu ai.

**Tofa Olo Fiti Afoa Vaai:** Lau afioga i le Fofoga Fetalai o se mea e fia faasao...

**FOFOGA FETALAI:** Se i tulai mai lau afioga i le Minisita o Galuega Tetele...

**Tofa Hon Olo Fiti Afoa Vaai:** O le NPO lea sa faatuina i le 2015. A toe repeal laia pe toe faaaleaogaina le Tulafono lea i le 2016, ae e le i oo mai ia le sui usufono o Vaimauga 1 i le Maota. E manaia foi lea se i ou faamanatu atu, ai aua e manaia ia o le mea lea na laga mai e le sui usufono i le le saina o le Komiti i le Lipoti lea. A o le mea sao lava ia, o la e totogi lava alauni lona uiga a fai e le i saina, lona uiga e le i iai ma se isi o le Komiti na fonu.

Ia ae silasila ifo lau afioga i le Fofoga Fetalai e le aoaia e le matapia le manaia...

**Tofa Hon Laufo Fonotoe Nuafesili Pierre Laufo:** Lau afioga i le Fofoga Fetalai...

**Tofa Hon Olo Fiti Afoa Vaai:** I le totogiina o latou alauni ia...

**Tofa Hon Laufo Fonotoe Nuafesili Pierre Laufo:** Se e le uma lava le taufaasese o le afioga i le Minisita...

**FOFOGA FETALAI:** Se i tulai mai lau afioga i le Taitai o le Itu Agai...

**Tofa Hon Lauofo Fonotoe Nuafesili Pierre Lauofo:** E le uma lava ia le taufaasese. O aso ia o saofai atu i i ma totonu o le Komiti le afioga i le Minisita, e leai ma se Lipoti e saina ai aua e le alu lava i ni fonu a le Komiti. Ioe, o le mea sao lava le mea lena.

Ae silasila, Sula, a maua se avanoa, ona aumai lea o lau Lipoti ou te tago e saina atu. O na ou te lagolagoina uma lava ia le matou Lipoti. E leai lava se mea o sese e matua 100% lau afioga i le Fofoga Fetalai.

**FOFOGA FETALAI:** Atonu o lea e faafofoga mai le Taitaifono atonu o le a oo iai sana faamalamalama i lea tulaga, ia ma malamalama ai foi ia le tatou Maota.

Ia se i tulai mai ia le sui usufono Tamaitai, Alataua Sisifo...

**Afioga ALIIMALEMANU MOTI MOMOEMASU ALOFA TUUAU:** Faafetai mo le avanoa, tulai atu e momoli le agaga faafetai i le afioga i le Taitaifono ma le Komiti i le Lipoti maeaea ia aemaise foi le afioga i le Loia Sili ma le latou Matagauega.

E faatau ia le fautuaga lona 2, i le faatinoina ia o Lipoti Faaletausaga, ona e matauina foi lea sa aumai foi i isi o fautuaga i Matagaluega ia ua uma ona o tatou tagofia a latou Lipoti, i le tulaga lea e faatau ai le fautuaga ua ave i le Komiti ina ia maioio lelei ia tulaga ia o outputs po o galuega e tatau ona ausia. Ma e tatau ona fesootai lelei lava outputs ia ma tatou strategy foi lea o le 5 tausaga lea ua uma ona pasia, ina ia uma ae le Paeaiga ua tatau ona ausia ia le tele o galuega ia na fuafua. E tatau foi ona manino ia Performance Indicators po o Fua Faatatau e fua ai galuega ia o le a faatino i le tausaga. Ma e tatau foi ona uma le tausaga, ua sau atoa ma achievements a Matagaluega ona laina tutusa lava lea o le 3 lena. Outputs, Key Performance Indicators ma Achievements, ina ia mafai ona fesootai ma tatou strategy lea na pasia i le tausaga na tea nei mo le 5 tausaga.

O le faatau e avatu le faafetai o se mea e tatau ona o tatou toe Iloilo, ina ia laugatasia uma ai Lipoti a Tausaga a Matagaluega a le Malo, aemaise lava Lipoti a Matagaluega ia e le o fuafua iai ni tupe mama mo auunaga. O le tuualalo lea faafetai mo lou avanoa lau afioga i le Fofoga Fetalai.

**FOFOGA FETALAI:** Malo faafetai, se i tulai mai ia le sui usufono o Falelatai ma Samatau.

**Afioga LUPEMATASILA GALUMALEMANA TOLOGATA TOGIA TILE LEI'A:** E momoli atu le agaga faafetai i le Taitaifono ma le Komiti. E faafetai i le afioga i le Taitaifono ma le Komiti e tusa ai ma le

lipoti. E pau lava nai vaega e faavavevave atu ai se fesili ma se fautuaga a lenei itumalo. O le faafitauli lea e aumai i le lipoti o tagata faigaluega, e le o se faafitauli laititi, e tele le faafitauli. O lea foi e maua i le lipoti, e tuuaina le Ofisa o le Va i Fafu, po o le Ofisa o Sikolasipi, i le le faia o ni avanoa sikolasipi mo alo ma fanau a le atunuu. Ae o le fesili e tuu atu i le Afioga i le Taitaifono, pe sa samania e le latou Komiti le Komiti o Sikolasipi, se i aumai se latou tali manino, ona o lea ua tuuaia le Ofisa o Sikolasipi i le lipoti a le Taitaiono ma le Komiti.

A o sau matau o lea foi sa faigaluega i le Malo, e le i faapea na faia e le Malo po o le Ofisa o Sikolasipi le faaiuga lea e faavae i luga o le leai o se faamaumauga. A o faamaumauga na i ai lenei taimi, ua matua toatele lava loia o le tatou atunuu. O lea sa fai ai le faaiuga a le Ofisa o Sikolasipi ma le Malo i lenei foi vaiata, se i tuu ititia avanoa sikolasipi mo loia, ae ave le faataua i isi professions o lo o manaomia e lo tatou atunuu. E pei o tulaga na sa faatino ai e le Malo, le faiga faavae lea i sikolasipi. O le isi vaega e fia avatu ai se fesoasoani, o lea e aumai i le lipoti ua tau leai ni loia e fiafia e faigaluega i le Ofisa o le Loia Sili. E tatau ona sailili maeaea, po o a ni mafuaaga e mafua ai. O le isi mafuaaga lea ua aumai, e faapea ua o loia ia i isi Matagaluga ma Faalapotopotoga Tumaoti a le Malo aua e tele le totogi ma faamanuiaga e maua ai. E tatau foi ona i ai se polokalame a le Ofisa o le Loia Sili e taofiofi ai loia ia e faamaoemoe i ai lo tatou Malo mo ana galuga fai. Afai ua o le toatele o loia sinia nei i tua i Matagaluga ma Faalapotopotoga, o se tuualalo a lenei itumalo. E manaia le faaoga e le Ofisa o le Loia Sili, loia ia aua o lea e foliga mai i le lipoti, o loia sinia ia o lea ua o atu i tua. Ae ua tau leai nisi sinia i totonu o le ofisa. Pe le mafai ona fai se polokalame ma se faiga e mafai ai ona galulue faatasi le Ofisa o le Loia sili ma loia ia e i tua i Matagaluga ma Faalapotopotoga, e fesoasoani i le faafitauli lea.

A faapea e mafai ona fesoasoani mai, o se faamama-avaega lenei i le Afioga i le Loia Sili ma le Ofisa o le Loia Sili. O se tuualalo lea e taua atu i lau afioga i le Fofoga Fetalai, ona o le taua tele o lenei foi Matagaluga a lo tatou Malo. Ma le agaga faaloalo.

**FOFOGA FETALAI:** Ia malo saunoa. Tulai maia lau afioga i le Taitaifono i le tali foi mo nisi o mataupu ua laga.

**Tofa AUUAPAAU MULIPOLA ALOITAFUA MULIPOLA:** E momoli le agaga faafetai e tusa ai foi i sui usufono sa faaalua finagalo, i le lipoti a lenei Komiti. O fautuaga uma ma finagalo faaalua e faamauina le agaga faafetai, e tusa ai foi i le sausaunoa i le lipoti a le Komiti lenei.

I le sui usufono o Vaimauga 1, ua talanoa i faamavaega a loia. Ma e fia avatu le faamalamalamaaga ona o le tulaga lea, sa oo i ai suesuega a le

Komiti pe mafua i se a ona faamavae le toatele o loia. O le tali lava na aumai, e le gata o fuafuaga faaloia lava ia, ae pei e lilifa lava i tulaga tau totogi.

O le tuualalo foi e uiga i soligatulafono, ia e sao. O le soligatulafono e le mafai ona tatou iloa le mea e tupu a taeao. E leai foi se rate foi lele e mafai ona tatou matauina se comparison o se mea e tupu i le isi tausaga ma le isi tausaga. E mafai lava ona aumai soligatulafono e mauualalo le rate o lenei tausaga, ae oo mai i le isi tausaga ua maualuga lava le siitaga. E mafua mai ona o soligatulafono. E le o se mea la faapea e i ai se measure po o se control foi lea i le tatou atunuu i le tulaga lea. A o le tulafono lava ia ma le mea ua tupu ua lipoti mai i le Ofisa o le Loia Sili, e mafai ona tatou mataituina i le tulaga lena. Ae sao, e matauina i le lipoti e tele le siitaga o soligatulafono o feagai ma le Ofisa o le Loia Sili.

O le isi vaega na taua, pe aisea na le saina ai isi sui o le Komiti i le lipoti. Mo le faamaninoga i le sui usufono o Vaimauga e tusa ma le faafesili. O le afioga ia Tea Peato, e pei ona outou silafia, ua le toe i ai i totonu o se komiti faa-Palemene ona o le soifua o lo tatou tama, le afioga ia Tea Peato, o lona soifua. Ma ua maea ona tuuina mai lana tusi faamavae ia te au le Taitaifono, ma ua oo foi i le Fofoga Fetalai o le Maota. O le taimi lea, sa tigaina le gasegase ma ua faaiuina ai ma lou finagalo, o le a faamavae ese ma le Komiti faa-Palemene ona o le soifua ua le lava le malosi.

O le tofa ia Lauofo le afioga i le Taitai o le Itu Agai, sa malaga i malaga i Niu Sila i le vaitaimi lea. O le tofa ia Fuiono sa malaga i malaga a le Malo i Tasmania. O sui ia o le Komiti lenei, na mafua ona le auai ona o tuatuaga faale-Malo. E masalo ua tali le finagalo o Vaimauga 1.

O le Vaisigano 1, o le toe faatuina o le itutino lea o le National Prosecution Office. E masalo la o lea ua tali le finagalo o le sui usufono o Vaisigano 1, sa faatuina i le 2015 peitai ua repeal i le 2016 ma o ona mataupu ma ona matafaioli lea ua tauave faatasi e le Ofisa o le Loia Sili i le taimi lenei.

O Alataua Sisifo ua faamauina foi fautuaga e tusa ai foi o key performance indicators ua faamauina lou finagalo e avea o se fautuaga i le Komiti.

O Samatau ma Falelatai, sa fesiligia e le sui usufono tagata faigaluega, pe mafua i se a, ona faamavae. E pei lava ona ou fai atu, o le aiatatau lava lea a le tagata ia. O le soifuaga foi o lo o outou soifua ma ou ola ai, tatou te vaavaai lava i laasaga e manuia ai le tagata lava ia, ma lona siosiomaga faaleaiga. Ae tele nisi vaega na fesiligia e pei o tulaga o totogi ma tulaga e pei ona ou taua. A tilotilo foi i faamanuiaga mai le isi itutino o le Malo, ia e faapena lava, leaga o le natura lava lea o tatou i le soifuaga nei. E tatou te tausinio mo mea sili, aemaise lava le itu tau faamanuiaga. E pei o le tali fuaitau atu lea i le sui usufono mo Falelatai ma Samatau, ae ua ave lava le fautuaga a le Komiti e pei o tulaga ia ua i ai nei, ona ua tele tele a tatou avanoa faasikolasipi i le mataupu lenei o le loia. O lea e pei ua manatu ua opuina i le taimi nei. Afai foi o se faaiuga o lea ua maua 2013 agai i le 2023 lenei, e 10 tausaga o taoto

le faaiuga lenei, ina ia faataatiaese, ae sa lilifa le Faigamalo i isi foi itutino o le Malo, ina ia atiae mai ai ni loia ma isi itutino ma isi foi itutino o lo o manaomia le ave i fafo o outou alo ma tatou fanau e faalatele le silafia. A o lea lava ua ave le fautuaga malosi a le Komiti, ina ia utagia le vaega lea.

O mafuaaga foi ua ala ai ona faamavae le toatele o nisi o loia, e pei lava ona ou fai atu, e le mafai ona tatou iloa o le misitelio lilo le mea lena. A i ai foi se siosiomaga o i ai sona lagona latou e fia alu ese i se isi foi siosiomaga e aumaia le fiafia i lona finagalo, o le natura lava lena o le tagata ia.

O le tali atu lea ma le faaaloalo tele e tusa ai foi o finagalo na laga e le Maota, manuia lau afioga i le Fofoga Fetalai ma le Fonousu a le atunuu. Faafetai.

**FOFOGA FETALAI:** Tulai mai lau afioga...

**Tofa Hon Laufo Fonotoe Nuafesili Pierre Laufo:** Lau afioga i le Fofoga Fetalai... o au o se tasi o sui o le Komiti, lea e mafua ai ona ou tulai atu. E le o se lauga ae na ona faaopoopo i le saunoaga matagofie a le Taitaifono. O latou e le auai i fonotaga a Komiti, ua faanoi, malaga i fafo pe i ai foi ni tuatuagia le maalofia, e le maua se alauni, e le totogia se alauni. O lona uiga e leai se mea o le a e saini ai fua i le lipoti, ona e te le o malamalama i le lipoti ona e te le i auai i le Fonotaga. E leai foi la ma sau alauni e maua. E faamanino atu le tulaga lea, leaga na saunoa lou uso a Minisita, le afioga i le Minisita ua tuua le Maota, fai mai e le i saini, e le i fonu, ae o la e maua le alauni. E leai se alauni e maua, faafetai.

**FOFOGA FETALAI:** Malo, o lea ua manino lea vaega. Tulai mai le sui usufono o Vaimauga 1.

**Afioga Sulamanaia Fetaiai Tauiliili Tuivasa:** O le agaga na avatu ai le manatu ona o le faafetai i le Komiti, ona o lea faatoa maua la, o lea ua leva ona leai si toeaina o Tea Peato mai Komiti, ona o lea ua ioe i ai le Taitaifono. Ae o le agaga faafetai i lenei itumalo, e silasila atu, e tasi le aso na faatino ai, ae 2 itula, ae o le tele o le tapenaga, ae 2 itula. Ae o le lipoti lenei i lau ia lava matau, pe ana o se isi komiti, e vaiaso atoa e tapena ai, ae 2 itula lea na faatino ai lenei...e pei o le agaga lena na ala ai ona fesili atu ai. Ae o le tulaga i le saini ma le le saini, e pei o le agaga lena, e faapea e ala ona le saini isi e teena le lipoti. Ae o lea ua maua, e le i auai o lea na malaga i fafo i fonotaga.

**FOFOGA FETALAI:** Ia faafetai lava le faamanatu mai i le sui usufono. O tatou lava ia e faapena, o le faatinoina foi o tatou galuega, e i ai lava isi tulaga e manino mai, ae i ai lava isi tulaga e faale-o-manino mai. A o le

tulaga lea e aumai, e taua foi o lea e faafogafoga mai ia Taitaifono ma Komiti mo le agai i luma o le tatou galuega.

Ou te tapa lau afioga i le Sui Palemia mo sau saunoaga, i nisi foi mataupu na laga e le Maota.

**Afioga Hon TUALA TEVAGA IOSEFO PONIFASIO:** E faafetai tele i lau afioga i le Fofoga Fetalai mo le avanoa. E na ona toe fonofaapipii lava i le taliatu a le Taitaifono a le Komiti, e tusa ai ma vaega ia o le faamavae o loia po o le tulaga ua siitia nisi vaega o le Malo e faatino ai auaunaga faaloia a nisi foi o loia. O nai tulaga taua lava o lo o faailoa mai e lenei lipoti, o le mafuaaga ua ala ai ona faamavae loia. Ou te iloa e tele lava mafuaaga, ae o le mea ua matauina foi e le Kapeneta i lenei vaitau, o le tulaga lea o totogi, ona e i ai le lagona. O le profession po o lenei auaunaga faaloia, e tai tutusa lava ma le faafomai. E pei o ni auaunaga faapitoa o lo o i ai foi le finauga a loia. Aua a alu le loia i le private, ioe e tele lava lona totogi i le itula. Aua o le tau o loia la e i ai i le itula, e amata mai lava i le \$200 e oo i le \$400, ia o isi ua ova atu.

E pei o le lagona lena, o le faasee ese o loia mai le Ofisa o Loia, ona o atu lea maua avanoa po o tulaga maua luga ACEO i totonu o isi Matagaluega, e faapena foi lea ona siitia le tulaga o totogi. Ma o lo o tali mai foi nai loia nei, i le manaoga o Matagaluega po o Faalapotopotoga, ua tofu lava le Faalapotopotoga ma le loia, i le position lea o le ACEO.

Ou te iloa foi o isi loia ua faapena, ona malaga atu i atunuu i fafo mo le faaauauina o aoaoga ma le tulaga o galuega. Na aumai foi e le sui usufono o Samatau ma Falelatai, po o i ai se polokalame po o faatino e le loia, ina ia mafai ona toe aumai uma loia i lalo o le Ofisa o le Loia Sili, ou te iloa o le matagofie ia o le uiga o le fesili lea. Ona ou te iloa o lo o galue le loia sili, ae o i foi o lo o i ai lona lagona i se tulaga. Ia pe toe aumai uma loia mai Faalapotopotoga eseese ma Matagaluega, ae aumai uma i lalo o le Ofisa o Loia. E manaia foi lena polokalame o lo o taumafai i ai, ae ou te iloa o se taimi ona faamanino mai lea o le finagalo o le loia sili. Ae o le taimi nei, o loia uma lava o lo o galulue i Faalapotopotoga a le Malo ia faapea foi i Matagaluega, o lo o i lalo uma lava i le vaavaaiga a le tatou loia sili ma le Ofisa o le Loia Sili. O lona uiga, o lo o galulue fesoosotai pea i le taimi lenei, i le sootaga va lelei lea.

O le tali atu lea lau afioga i nisi vaega. Ae o le tulaga o le NPO, o lo o i ai foi lagona o le tatou Faigamalo, e ao ona toe fafagu mai se vaega lea o se vaega taua ona o lo o i ai i totonu o lana taiala mo le atinae o Samoa, se tulaga e tatau lava ona i ai se Faalapotopotoga Tutoatasi, atonu e le toe faaigoaina o le NPO a o se isi igoa. O lo o i ai lava le agaga o le Malo ia i ai pea se Faalapotopotoga Tutoatasi faapea mo le tauaveina o prosecution a lo tatou Malo. Faafetai i lau afioga.

**FOFOGA FETALAI:** Ou te tapa lau afioga i le Taitaifono mo le lafo.

**Afioga Lupematasila Galumalemana Tologata Togia Tile Lei'a:** Lau afioga i le Fofoga Fetalai....

**FOFOGA FETALAI:** E i ai se mataupu o totoe....

**Afioga Lupematasila Galumalemana Tologata Togia Tile Lei'a:** Na o si mea laititi lava lea. E momoli atu le agaga faafetai tele i le Afioga i le Sui Palemia poo le Afioga foi i le Minisita, lea ua maua tonu mai lava le tuualalo ma le fautuaga sa avatu. Ae pau lava le isi faaopoopoga ona a toe aumai uma Loia nei i lalo o le Ofisa o le Loia Sili, e tele le tupe e faatino ai a o le taimi lenei o la e maua le fesoasoani. Ona o la e totogi lava e le Matagaluega ma SOE's a latou Loia a o le agaga lena ua maua mai ina ia mafai ona oversee pe supervise atu e le Loia Sili ona mafai ai lava lea ona galulue i ofisa o i ai. O lenei foi e faaletonu le tatou tamaoiga i lenei vaitau a o se faiga lena e mafai ona fai e fesoasoani ai i le tatou Ofisa o le Loia Sili ma le agaga faafetai .

**FOFOGA FETALAI:** Ou te iloa o lea e manino lava le saunoaga a le Sui Palemia. O Loia uma ia e galulue i Faalapotopotoga ma isi Matagaluega e vaai uma atu a e le Loia Sili. E le tau toe suia foi ni latou totogi ma ni mea faapena, e fesoasoani uma lava i le Loia Sili pe iai a se mea e moomia, tulai mai lau Afioga i le Taitaifono mo le Lafo.

**Afioga AUUAPAAU MULIPOLA ALOITAFUA MULIPOLA:** Lau Afioga i le Fofoga Fetalai ae ou te lei faatuina le lafo avea lenei avanoa e momolui atu ai le faafetai i sui usufono o lau Komiti lau Afioga i le Sui Taitaifono le igoa matua Ale faapea foi le Afioga i le Taitai o le Itu Agai mo le tatou galuega, tatou faamalosi pea e tulei le maa vaeatu le paia o le Maota Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le P.P 2022/2023 Nu.94 Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P 2021/2022 Nu.23, Lipoti Faaletausaga a le Ofisa o le Loia Sili mo le Tausaga Faaletupe 2019/2020.*

Ma le faaaloalo lau Afioga.

*Faaluaina e le sui usufono mamalu mai Safata 2, sui usufono mo Vaisigano 1, sui usufono mo Faleata 1 ma le sui usufono mo Gagaiifomauga 2.*

*Na faamaonia le lafo.*

**FOFOGA FETALAI:** Ou te tapa lau Afioga i le Sui Palemia mo le Lafo o Tali a le Malo .

**Afioga Hon TUALA TEVAGA IOSEFO PONIFASIO:** Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa Tali a le Malo i Fautuaga a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae e pei ona ou tolaulauina.*

*Faaluaina e le Afioga i le Minisita mo Faatoaga ma Faiga Faiva.*

*Na faamaonia le Tali a le Malo.*

**FOFOGA FETALAI:** Malo faafetai o lea ua tatou toai mai i le iuga o tatou galuega malo faafetai o lea ua maea lelei a tatou Lipoti. O se taimi avatu se tala a le Nofoa ae o lenei taimi, ou te tapa lau Afioga i le Sui Palemia mo sau saunoaga, ona faauma atu foi lea e le Nofoa.

#### **SAUNOAGA FAAFETAI A LE SUI PALEMIA**

**Afioga Hon TUALA TEVAGA IOSEFO PONIFASIO:** Lau Afioga i le Fofoga Fetalai o lea ua talatuu le tafaoga le tofa tatala, ua liligo le vaitoa, ua taia faatolu le palealugaga e pei o le faiva o tapalega. Ua iite le malama i sau ina ua gafoa ata o le taeao fou, ua maea ona siitia le atu i le aleaga i la tatou faapolo ma le faasagi. O le faafetai lea ma le Viiga i lo tatou tapau Sili o i le lagi ona o lona agalelei faasoa ma lona alofa le faatuaioia. Lea ua tatou potu ai i manu ma le manuia i lenei taeao . Ua tatou feiloai foi i le magafetau soifua vaeane le vaitele o le Fonousu o le Palemene o Samoa, ae tainane le tapuaiga mamala a lo tatou atunuu. Ou te manatua i lenei taeao le tala e fai i le faiva o Malofie. Ua ano le Pula ua logo foi le Tuli i le Tata. Ae manatu foi le faiva o Fogatia o Aliiseu fai mai, ua faaifo i tula le lupe sa saili e mafua ina ua asuasua foi faiva sa faasou ai le Palemene o Samoa.

Ua faamalo i le Tofa i lau Afioga le Fofoga Fetalai faamalo le onosai, faamalo le faatoatoa, faamalo foi le lavapapale. Ua outou tatala le ato ponapona ma ua tatou aoao mai foi faamanogi o se lolo finagalo faaalua aua le fatufatuina ma le toe amataina o le upega fagota o Pili, aua le faatalanoaina ma faamaoniaina i totonu o le fonotaga lenei a tatou lipoti. Tele foi nisi o taimi sa siisii le felafolafoaiga ma lugaluga foi le tai i finagalo o Afioga i sui usufono mamalu o le maota. Ae a tatou to manatu iai o nisi o saunoaga, ma finagalo faaalua o loo iai se fatuola a pau i le eleele lelei o lea tupu ma ola talaulau ma maua ai se manuia o Samoa ma ona tagata a Nuu o a taeao.



Lau Afioga i le Fofoga Fetalai, o Lipoti e pei ona faafofoga iai lo tatou atunuu , o tolaulauina i totonu o le Palemene, e iai le manatu o se galuega taua sa fita i tuga ai le Palemene aemaise lau Afioga. Momoli atu ai le agaga ole faafetai. Ae lei faaauauina la'u faafetai lau Afioga e ao pea ona ou talanoa atu i nisi o vaega e pei ona taoto ai se fesili foi o nisi o sui e tusa ai male tulaga o le tatou pisinisi laisene. Ina ua maea ma tapunia le vaitaimi sa tuuina atu mo le faafouina o laisene, ua tuuina mai le lipoti a lenei Matagaluega e pei o se mea ua toe 20% le vaega o Laisene o loo faagasolo nei o loo totoe. O lona uiga ua 80% o Laisene faafou faapea foi pisinisi ua maea ona iloiloina, ua uma foi ona tuu atu ia latou Laisene. Ae e i ai le manatu e lei faigofie lenei tulaga i le mamalu o le atunuu aemaise le au faipisinisi. E le i faigofie foi ae avanoa foi lenei taimi e avatu ai se faamalulu i le atunuu aemaise o le au fai pisinisi ona o tulaga e pei ona feagai ai le Ofisa nei, aemaise le mamalu o le atunuu sa afifio atu e faafou a latou laisene pisinisi.

E momoli atu le faamaulaloga ona o tulaga e tusa ai foi o le tali mai a lenei Matagaluega e le i atoatoa. O lape ia o loo matou matauina ae sa i ai lava le agaga e le toe tulai mai faafitauli pea toe faafou tatou laisene i le tausaga. O se tulaga faigata e pei ona iai e iai lava le manatu o le a tulai mai ai se tulaga lelei soo se mea kava e faigata e iai lava le talitonuga e iu ina lelei, e tulai mai ai se tulaga o le atoatoa aemaise foi o le matagofie e lei faigofie le tulaga sa i ai. Ae faailoa atu ma le agaga maualalo poo le agaga fiafia foi, o lea lava ua tali mai le tatou atunuu e tusa ai ma tulafono e pei ona faatalaauula atu ai lenei Matagaluega ina ia utagia. Ua atoatoa uma le faatulagaga o tatou faila ua tele foi le information ua tuuina mai ua manino ai foi lenei Ofisa i le au fai pisinisi. O lo o feagai pea ma latou i taimi o lafoga ma taimi e fai ai ia feutagaina faapena o le tulaga i le mei ese o pisinisi laisene mai le Matagaluega o Tiute.

E i ai le manatu e ao pea ona avatu ai sina tala ona o lea Business License o loo iai le sootaga ma le aoina o lafoga o le tulaga foi o tulafono uma lava i Lafoga faapea foi ma Business License. O lo o i lalo uma lava o le Matagaluega lenei o Tiute ma Tupe Maua o lona uiga o i lea o loo iai le Administration poo le faatinoga foi o le tulafono, e faatatau i pisinisi ma lafoga ona o le sootaga lea. Pau lava le tulafono o lo o i lalo o le MCIL o le tulafono o le resitalaina o Kamupani, o i latou ia o loo i ai le tulafono lea o vaega o kamupani. A oo loa la i Kamupani ia mai fafo e pei ona fesili ai i foreign investors o MCIL e gafa ma latou nei o latou foi na iai le Pule e tuuina atu ai i mea foi ia FIC poo Foreign Investment Certificate o latou o loo feagai ai ma le tulaga lea. O pisinisi lava a Samoa moni e le o i ai se aafiaga a malaga se Samoa a o lea e te i inei. E leai se aafiaga vagana ai o totonu lau tax i fafo ona toe aafia ai lea o oe i inei i le tulaga foi lea o se double tax system. E ono fesiligia ai le tulaga lena poo fea o totonu ai lau

tax, ae o le tulaga a ia i tagata Samoa moni lava o loo fai pisinisi i Samoa, e leai se aafiaga. E te malaga oe i o e te toe foi mai lava ae tumau pea le resitalaina o lau pisinisi.

O le faafaigata o loo tulai mai nei ona o nisi o tatou, o nisi o pisinisi aemaise lava mo family business e tasi le pisinisi ae pe toafa toalima tagata o le aiga o loo lesitala uma i totonu o le pisinisi o nisi la ua alala ma afifio fafo ua faafaigata ai ona faatino manaoga o le business license, o le tuuina mai lea o bank account, o IDS o mea uma faapena. Atonu la o i le faafesili mai le sui lea o Faasaleleaga 5. O le tulaga e moi o loo iai le faafaigata ae atonu o loo mafai lava ona faatino. O le tulaga lena ae le mafai ona see mai le Business License ona o tulafono, o i foi o loo iai le system lea a le Lafoga o oloo taua o le RMS poo le Revenue Management System o loo faatino foi le Business License aemaise foi le tatou revenue o le tatou tupe lea o loo aoina . Ia na o le pau lea o le tulaga e fia pai atu ai i le itu lea ae o le faauma atu sau faafetai lau Afioga i le Fofoga Fetalai.

E ao foi ona avatu se faafetai i le Tapuaiga a le Afioga i le Ao Mamalu o le Malo o lea manatu atu o le a faaifoifo le tulaga o le tatou fonotaga aemaise foi le Afioga i le Sui o le Fono Sui Tofia, le Afioga I le Tamaitai Palemia. E ui lava ina tatou le faatasi ae tatou talosia pea lana faigamalaga ona o tiute faava-o-malo. Alofagia e le Atua ia asiasi pea ma faatasi atu ma ia i tulaga uma o lana faigamalaga, momoli atu le faafetai i Afioga i Minisita o le Kapeneta, faapea foi Minisita Lagolago ma mamalu o sui usufono uma lava. Lau Afioga i le Taitai o le Itu Agai, momoli atu le faafetai. Manatua foi le tapuaiga a taitai o Ekalesia eseese i soo se fata faitaulaga i Samoa nei ma le aufaigaluega paia a le Atua, faafetai mo la outou tapuaiga. Nisi foi o Samoa faapena ona aumau i atunuu mamao, so o se tafa ole lalolagi faafetai mo la outou tapuaiga, manatua foi Tutuila ma Manua ia momoli atu le agaga o le faafetai.

Lau Afioga i le Fofoga Fetalai o le faafetai mulimuli i lau Afioga, faafetai tele lava mo lou faatoatoa aemaise ai foi o le faatautaiga o le tatou fono, faapea foi le feagai ai ma Taitaifono uma lava o Komiti o le Palemene ma tou Sui Usufono uma lava o loo Komiti Faale-palemene aemaise foi o Ofisa Sili o Pulega o le tatou Malo sa faapena ona velo aso ma fai o outou sao i tatou lipoti, e pei ona tolaulauina i le Palemene. Manuia le Fono a Samoa.

**FOFOGA FETALAI:** Malo saunoa i lau Afioga i le Sui Palemia, ia se i tulai mai lau Afioga i le Minisita o Faatoaga ma Faiga Faiva.

**Susuga Hon LAAULI LEUATEA POLATAIVAO FOSI:** Manatu e le faaluaina le saunoaga po o le maleleaga a le Afioga i le Sui Palemia, saunoaga autu ia e faaiu ai le tatou Fono ae lei malele lau Afioga i le Fofoga Fetalai e faaiu.

Ae i ai lava si mataupu lau Afioga e le o nofo filemu ai le agaga ma le lotu. E fiafia faiae ai le faafetai ona o le tualumaga o le tatou Fono. Ae ese lenei vaiatau lau Afioga i le Fofoga Fetalai ona o lau faatofalaiga, ae talu mai lava ona filifili le Afioga i le Taitai o le Itu Agai ma lena Itu ua sui lagona sui foi manatu ona o le mafanafana o le tatou fesootaiga vavalalata. Ma e momoli atu ai le agaga faafetai tele. O lea ua saunoa le Afioga i le Sui Palemia ae e i ai lava si mea laititi lea lau Afioga ou te le manao ou te alu ae lei fai atua ua tatou le faatasi nei male sui usufono o Vaimauga 3, ua tuua lona nofoa, ona o se mataupu tuga ua toe tulai mai foi. Lau Afioga i le Fofoga Fetalai, ua ou manatu e tatau pea ona faaleo i le Maota, ona ua liua lota fiafia e avea ma faanoanoa ona o lea ua toe agiga ananafi, ua toe fa'i foi lona sa. E le i faia lana lauga faataupou, e le i saunoa foi i le Maota a o lea faatoa uma ona fai lana faatautoga lau Afioga.

O le ala o lou tulai, lau Afioga i le Taitai o le Itu Agai, o lena e i ina le tofa, na ona matou faaoololomaau. O lenei lava matou te ooloolopitovaa ma o matou taumafai atu e fusi le fau o malo. O a foi tatou feupuaiga ma tala i luga o upega o faamatalaga, o lea lava e tapuai Olo o lea foi ou te tapuai i tulaga tau faamasinoga, ona e i ai lava le taimi o le Atua. Aepeitai ane o le maitau, paga lea, talofa e, o la e ua toe ausulusulu i loia e tau talitali atu le mataupu a lena Itu o le Maota. Le Falemauga, Tuisamau, o Fusi ma Fanuatanu e tau i Sinave ma Ulumotootua, o Fale Vaimauga o le aiga. Fuata, e le tau fai atu, o le aiga lea na tatou fai ai upu, a uma le palota o ai e tulai mai, o lena. A o lea le mea lea ua toe fai? Ia e le aoaia e Laupua Tamafaiga na ona matou piipiiama ma o matou faaoololomaau ina ne i pule mai tua aiga, a o lea tou te afifio mai ma tatou faafesagai i taimi uma ma aso uma. E tuaoi le Fale Anoamaa ma le Fale Vaimauga ma Faleata e tausia le atunuu.

Lau Afioga i le Fofoga Fetalai, ua ou manatu ou te le tulai gugu i le mataupu lea. Talofa e i le tapuaiga a le Fale Vaimauga 3, e le i gagana a o lea ua velo le isi tao. E avatu ai pea lau faamalosiau, uso, tatou tapena. O le savali a le Faatuatua i le Atua Samoa ua Tasi, lototetele ma tatou faatuatua i le Atua. O le agaga lena, leaga o lea e tapuai Samoa ma le tatou Palemene, aemaise foi o le tapuaiga a faafeagaiga taulagi. Se tatou tausi ia le filemu, sunui alao aua ae tatou ave le faamoemoe i le Atua e fesoasoani mai le uso.

Ia o le agaga lea ma le faaaloalo faafetai mo lou avanoa.

**FOFOGA FETALAI:** Malo saunoa i lau Afioga i le Minisita mo Faatoaga ma Faiga Faiva, aemaise foi o le faailoa mai o le tulaga lea, malo lava faafetai. E le i maua atu e le Nofoa le tulaga lea, ae faafetai o lea ua faailoa mai, o lea ua e saunoa, tatou faamoemoe i le Atua, tatalo lava i le Atua e maua ai le fesoasoani mo faafitauli foi ma tulaga o mea faapea. O le mea lea, ia tatou lototetele ma tatou tuu i le Atua mea uma.

Lau Afioga i le Taitai o le Itu Agai, e te fia saunoa e paleauau aua foi le saunoaga a le Malo.

## **SAUNOAGA TALIFUAITAU A LE TAITAI O LE ITU AGAI**

**Tofa Hon LAUOFO FONOTOE NUAFESILI PIERRE LAUOFO:** Faafetai ua maua so matou avanoa lau Afioga i le Fofoga Fetalai. Ae ua lelei lau Afioga i le Minisita o Faatoaga, ia o le a taoto mai pei ona saunoa le Afioga i le Fofoga Fetalai, ia taoto mai lou fanoga i lenei foi aoauli se i silasila foi i ai lenei foi Itu ma le tulaga ua i ai, ona e le o tele foi se malamalama i le mataupu e pei ona faateia ai foi ona faatulai mai i lenei taeao.

Ae ua tulai foi atu i sina upu e tau ina talifuaitau ai le saunoaga matagofie a le Afioga i le Sui Palemia. E manatu o lea ua suni tau i le tini galuega a le tatou Palemene i lenei foi tauaofiaga i le la vaiaso ma lenei vaiaso, ma o lea ua opea nei i Maota le saunoaga faafetai a le Afioga i le Sui Palemia, i le galuega tele sa fitaituga i ai lau Afioga i le Fofoga Fetalai faapea le maualuga o lenei Maota. E i ai la le manatu lau Afioga i le Sui Palemia, o lea ua maea ona e sala mai le laufanua ua uma foi ona e ilo ma taia le uluola o tumutumu iloga e pei o le fetalaiga i le galuega a le Aiga Salevaiolo. Malo faafetai. Faafetai foi i upu faalaeiau.

Ia o le matou foi maitau i lena vaiaso ua tuanai atu e oo mai i lenei vaiaso, a! se ua maea lava ona asia aau mamao ma aau lalata, ma o lea ua ae nei i fanua le faatamasoaliiga, ua siliofe foi tautai o le vasa, ua faamalo le tautai ae. A o le upu foi e fai i le itulagi i Sasae, a lea ua seu i auvaemauga ua maua lupe o le foaga, ae ua seu foi i tumutumu mauga ua maua lupe o le vateatea. O lea la ua silimea le seuga aua ua titimanu ua lavamanu i lenei foi tauaofiaga e pei ona i ai. Matou faafetai. Faafetai mo le tofa sailimalo ma le faautautaga loloto. Ia e i ai lava le talitonuga o lele ua tu lava le vaga i le figota a ua tenetene ma saasaa livaliva.

O le vaiaso pei ona i ai ma le tatou galuega, ia e pei e faapitoa mo le aufaigaluega a le Malo ma le faatinoga o a latou galuega, i lalo o le taitaiga ma faamalumaluga a afioga i Minisita faapea foi ma le Kapeneta e pei ona lipotia mai i a latou Lipoti Faaletausaga a Matagaluega ma Faalapotopotoga.

Ia, le aufaigaluega a le Malo, ua faamalo le galulue. Ua faafofoga Samoa i le lauiliuina o a outou Lipoti Faaletausaga, o a outou galuega ia sa faatino i lena foi piriota ma lena vaitaimi. Ua faamalo la le tauatai, ua faamalo le tautua malo, ua faamalo le tautua atunuu. Ia e i ai lo matou lagona, e le pau fua lo outou afu maligi, e tau ai atu e le Atua lo outou tautiga. A o upu masani, o nei e fau ai a taeao.

Lau Afioga i le Fofoga Fetalai, le Sui Palemia ma le maualuga o lena Itu o le Maota, o a ni galuega lelei ua mafai ona faatino i lena foi vaiaso ma lenei vaiaso, faatasi ai ma se lagolagosua atu a lenei Itu o le Maota, foi lava le viiga i le Atua aua o Ia e ou mea uma lava, ae tatou faapea ifo, o tatou lava o ni auauna le aoga ma le faatauva.

Ia faamanuia le Atua i lau Afioga i le Fofoga Fetalai, maua lou malosi, maua le tofa mai le Atua aua le faatinoina o ou tiute ma lou valaauina.

Lau Afioga i le Sui Palemia, ia maualuga pea le aoina o le masina i lau Afioga, ia i ai le agalelei o le Atua i le Aiga Kapeneta, Sui Fofoga Fetalai faapea Afioga i Minisita Lagolago i lena foi Itu o le Maota.

Ia liua le vai o le tamaitai i lea Itu o le Malu, ia faafualoaina e le Atua le soifua o Afioga i sui usufono, ia maua foi lo latou malosi, maua le tofa aua le faatinoina o le latou pitolaau o le agaia lea o le Malo.

Ia manu ifo mai lagi i le tapuaiga a Samoa mai ona ao seia oo atu lava i se e aupito itiiti.

Auauna tofofi a le Atua o lo o punopunouai faalaau sautia o tausoga i so o se tafa o le atunuu ma atunuu e mamao, ia faapena ona i ai le agalelei o le Atua. Maua lo outou malosi, maua pea le tofa paia aua lo outou valaauina.

Faafetai i lau susuga i le faafeagai ma le faletua, ua tatou faatasi lava i lena vaiaso ua tuana'i ma lenei vaiaso, aua le tapuaia o le Fonousu a le atunuu. Faamanuia le Atua pe a toe talia atu ma foi atu i atunuu mamao, ia taiala le Atua i le ala.

Le afaigaluega a le Malo, ia lena ua mautu atu sa matou tala, faamalo le tautua matavela.

Lau susuga i le Failautusi o le Fono ma le afaigaluega, ia o outou o lo o outou nonofo tuavae aua le tautuaina o le Maota ma le Fonousu a le atunuu, ia faamanuia le Atua i la outou galuega.

Alofagia e le Atua le faigamalaga a le Afioga i le Palemia, faapea foi nisi o si usufono o le Maota o lo o sailiili matagi i atunuu mamao, ia aumai e le Atua se aso o muamua tatou feiloai ai i le manuia i Lona alofa ma Lona agalelei.

Lau Afioga i le Fofoga Fetalai, oi talofa e! I Afioga i sui usufono o lo o tapena mo faamasinoga, ia, ioe, talofa e! molimau ma le amiotonu, molimau ma le amiotonu. Ia fesoasoani foi le Atua i le tulaga o lo o outou alo atu i ai.

Ae lau Afioga i le Fofoga Fetalai, e manatu foi o le a foi se matou leo, ae tatou mavae ia i le upu i le itulagi le la, o manu na o manu nei. Tatou toe feiloai i manu, foi mai so matou leo, ola le tamaloa mai Atua. Soifua ma ia manuia.

## TOLOPOINA

**FOFOGA FETALAI:** Malo saunoa i lau Afioga i le Taitai o le Itu Agai, ae paleauau ai foi le saunoaga a le Afioga i le Sui Palemia, aemaise foi o le faaopoopo mai a le Minisita i le Itu a le Malo, ia, ou te talitonu o lea ua fetai fola. Ae le mafai lava ona tuua le tulaga aloaia o se leo po o se upu a le Fofoga Fetalai e faauma ai le tatou aso.

Ia, e fia faaleo lava le lagona o le loto faagaetia e momoli atu le faafetai tele a le Fofoga Fetalai i le paia o le tatou Palemene i lo outou lavapapale ma le onosai i le taumafaiga o le tatou galuega e afua mai lena vaiaso seia oo mai i lenei aso Fono. Faafetai i le galuega sa feagai ai ma tatou Komiti Faa-Palemene taitasi e ala i Lipoti sa iloiloa, faamalo mo le faatinoga o le matafaioi mataitu a le Palemene.

Lau Afioga i le Sui Palemia ma le paia o le Kapeneta, e momoli atu le faafetai i le soaina o le galuega a le Palemene e ala i la outou pitolaau e tusa o Tali a le tatou Malo i Fautuaga a Komiti Faa-Palemene. E le lilo le tele o matafaioi o feagai ai ma le Kapeneta, ae faamalo faafetai o lo o tuuina mai pea le faamuamua i lenei vaega o le tatou galuega. Malo faafetai.

Faafetai atu i usugafono uma a le tatou Maota i finagalo faaalua. O upu e masani ai, e le sua se lolo i le seaea ae o le tele o sulu e maua ai figota. O lea ua toi'u le faiva ina ua laulausasa lo outou faiva, faafetai tapena, faamalo fai o le faiva ma ua tautai a'e.

Ua molimau faafofoga Samoa i tatou taualumaga, o le ata manino lena o le faatauaina o lo outou valaauina, malo faafetai. Peitai, e leai lava se faiva e asa ma se maumau. Pe afai ua sipa le lamaga i le faatautaiga a le Fofoga Fetalai, ia outou alolofa ma faamagalalo. Tuli i luma so tatou ai mo le tapuaiga a Samoa a ia sili o se viiga o le Atua. O le a foi se galuega ua lelei ona tatou fai, ia tumau lo tatou faatauvaa, a ia tatou faaee i fata ma faatali le afi o le agaga paia e faamu ai le tatou taulaga.

Ua uma lava le tatou galuega i lenei vaiaso ae o lo o tapuaia pea o tatou faiva i le Maota nei e le susuga i le auuina faauuina a le Atua Pastor Taeauga Ropati ma le faletua, malo faafetai. Ae faapea foi i nisi o le atunuu o lo o tatou mafuta pea, e momoli atu le matou faafetai. O upu tuusao, o le molimau lea o le tino o la outou tatalo ma le tapuaiga i le alofaiva o le Palemene. Faafetai tatalo, faamalo tapuai. Ia saga faamanuia le Atua i lo oulua valaauina mo lana galuega ae faapea foi i nisi o le mamalu o le atunuu o lo o tatou mafuta.

Le paia i Ofisa Sili o Pulega o Matagaluega ma Faalapotopotoga Tumaoti a le tatou Malo, malo faafetai le onosai. Ua see lelei le sa o le Palemene ona o le tatou ololo pitovaa. O le tatalo a le Palemene, ia tafatafafuga ma ia tafatafamaogo lo outou valaauina.

Le tapuaiga a lau Afioga i Le Ao Mamalu o le Malo ma lau Masiofo, le Sui o le Fono a Sui Tofia ma lou faletua, lau Afioga i le Faamasino Sili ma le itutino o le Faamasinoga, faapea foi i Faaluuluga o Ekalesia Kerisiano uma

ma le afaigaluega tofofi o le Talalelei, ae tainane Aiga ma Tama, Tama ma Aiga, le usoga a Tumua ma Pule, Ituau ma Alataua, Aiga i le Tai ma le Vaa o Fonoti. E momoli atu le faafetai a le Palemene i lau tapuaiga, ua manuia faiva o le Maota nei ona o lau tatalo. O le a se gagana a lau Palemene ua sala i lenei 2 vaiaso, ia matou te faamalulu atu, alofagia ma faamagalo. A o le matou tatalo, ia agalelei le Atua ma saga faamanuia i le tatou atunuu.

Faafetai atu i le tautua faifaipea a le Matagaluega o Leoleo ma Falepuipui, le Pulega o Auaunaga Tau Tinei Mu ma Faalavelave Tutupu Faafuasei, ma le kamupani a le Cooline mo le puipuga o le saogalemu o le Palemene i ana fonotaga.

E faafetai atu foi i le auaunaga a le Matagaluega o Fesootaiga ma Faamatalaga Tekonolosi e ala i le 2AP mo le faasalalauina tuusao o taualumaga a le Palemene mo le silafia e le atunuu. Malo faafetai tautua, ia faamanuia le Atua i lo outou valaauina.

E le faagaloina foi le tautua i le ao ma le po a le Afioga i le Failautusi ma le Sui Failautusi, faapea le afaigaluega a le tao faafuavelo, ia maua pea lo outou malosia faafouina mo le tautuaina o le Fonousu a le atunuu.

O lea o le a tatou taumavae seia aulia le isi a tatou Fonotaga i le masina o Me o le tausaga nei. Ia talosia ia i le alofa o le Atua ia momoli atu i ai le soifua o le Palemene ma lo tatou Maota nei. Manatua ane le Taitai o le Malo ma isi sui usufono o le tatou Maota i a outou talosaga molia. E ese lava lagona pe a maea a tatou Fonotaga. O le a ea se tatou mea e mafai pe ana faapea e le au mai le Atua ma i tatou.

Ou te talosaga atu ia tatou tutulai faatasi toe faafoi atu le viiga ma le faafetai i le Atua ona o Lona alofa ua tau manuia ai le tatou Fonotaga i lenei 2 vaiaso.

*Na tolopo Taulumaga a le Fono Aoao Faitulafono i le itula e 1:25 i le afiafi, seia aulia le Aso Lua, 30 Me 2023 i le itula e 9:30 i le taeao.*